


G Chinese

7

Vol. VII



古今醫案按卷第七

吳江李齡壽辛垞重較輯

嘉善俞震東扶纂輯

男念祖永修較字

得璜礪溪

孫男掌明同若全較

賂南貽賢

頭痛

羅謙甫治柏參謀六十一歲初患頭昏悶微痛醫作傷寒治汗後其痛彌篤再汗之不堪其痛矣易醫用藥大都相近甚至痛不能卧且惡風寒不喜飲食羅診之六脉弦細而微氣短促懶言語內經云春氣者病在頭今年高氣弱清氣不能上升頭面故昏悶耳且此證本無表邪汗之過多則清陽之氣愈虧不能上榮亦不得外固所以頭痛楚而惡風寒氣短弱而憎飲食以黃芪一錢五分人參一錢炙甘草七分白朮陳皮歸芍各五分

升柴各三分。細辛川芎蔓荊子各二分。名之曰順氣和中湯。食後進之。一飲而病減。再飲而病卻。

戴人治一婦頭偏痛。五七年。大便燥結。雙目赤腫。眩暈。凡療頭風之藥。靡所不試。且頭受針灸無數。戴人診之。急數而有力。風熱之甚也。此頭角痛。是三焦相火之經。乃陽明燥金勝也。燥金勝。乘肝則肝氣鬱。肝氣鬱。則氣血壅。氣血壅。則上下不通。故燥結於中。尋至失明。以大承氣湯倍加芒硝。下泄二十餘行。次服七宣丸。神功丸。以潤之。目豁首輕。燥澤結釋而愈。

薛立齋治劉尚寶。怒則太陽作痛。用小柴胡。加茯苓山梔。以清肝火。更用六味。以生腎水。遂不復作。

李士材治少宰蔣恬菴。頭痛如破。昏重不寤。風藥血藥痰藥。久治無功。李曰。尺微寸滑。腎虛水泛。為痰也。地黃四錢。山藥丹皮澤瀉各一錢。茯苓三錢。沉香八分。日服四貼。兩日輒減六七。更以七味丸。人參湯送五日。其痛若失。

孫東宿治蔡樂門令眷頭痛如破髮根稍動則痛延滿頭暈倒不省人事踰半時乃甦偏身亦作疼胸膈飽悶飲湯水停膈間不下先一日吐清水數次蛔蟲三條原為怒起今或惡風或惡熱口或渴或不渴大便秘脉則六部皆滑大有力孫曰此痰厥頭痛證也先以藿香正氣散止其吐繼以牛黃丸黑虎丹清其人事頭仍疼甚又以天麻藜本各三錢半夏二錢麻黃薄荷白芷陳皮生薑葱白煎服得少汗而頭痛少止至晚再服之五更痛止大半而人事未全清孫謂此中焦痰盛非下不可乃用半夏五錢巴霜一分麵糊丸每服三十九生薑湯送下午後大便行三次皆稠粘痰積也由此飲食少進餘證差可惟偏身仍略疼改用二陳湯加前胡藜本薄荷黃芩石膏枳殼石菖蒲調理而安

僧慎柔治一貴介年三旬先因齒痛用石膏三錢煎服頃即滿頭皆腫痛牙齦上膠腫勢尤甚天明稍退蓋得陽氣故也診之右關細澁左關洪左尺亦澁慎柔謂須納氣下達方得脉和定方名羗活散火湯羗活酒炒五

分防風三分酒連一分酒苓二分白茯苓一錢人參二錢甘草五分半夏一錢破故紙一錢枸杞子一錢二劑其細瀉脉即粗大是陽氣下行矣頭痛稍止可見前頭痛是下焦無陽陰火上衝服至八劑頭痛全止齒根腫猶未退脉則益和曰將愈矣此陽氣已至恙所果四五日後出膿少許而瘳。

震

按羅案是氣虛頭痛張案是積熱頭痛薛案是肝火頭痛李案是腎

虛頭痛孫案是痰厥頭痛僧案是陽升不降頭痛六種之外又有因風痛者抽掣惡風鼻塞眼脹因寒痛者惡寒戰慄面慘肢冷因溼痛者頭痛且重天陰轉甚或四肢疼腫面目浮腫此皆外因也內因則氣虛之外血虛更多積痰之外積食亦有丹溪云肥人頭痛多是溼痰瘦人頭痛多是血虛有火斯誠要言然因雖數端靡不兼風無風入只作眩不作痛也故古方中川芎茶調散大追風散頗亦取效痛久則成頭風其方更繁不能縷述真頭痛乃死證外灸百會穴內進參附湯黑錫丹或

冀挽回實未試驗尋常頭痛亦有死者高陽生云頭痛短瀆應須死生平
曾見之矣頭與腹俱痛有五證臭毒傷酒傷溼不伏水土瘡毒入腹也
有頭痛止則腹痛腹痛止則頭痛此屬脾陰虛胃火隨氣上下芎歸
芍藥木香香附黃連葱白又有頭痛諸藥不效其痛更甚者或因督脉
為病宜用茸硃丹次則香茸八味丸復有雷頭風另是一項乃內鬱痰
火外束風熱大頭風即大頭瘟或痛或不痛或潰或自消死生反掌至
如眉稜骨痛係足少陽風熱與痰最能傷目至兩耳出膿則危矣宜以
濃茶一碗搥吐之次用清上藥如選奇湯清空膏之類婦人注目針繡
往往眉骨痠痛必須益陰養血

隋子和治一僧頭熱而痛且畏明以布圍其頂上置冰於其中日數易
之此三陽畜熱故也復灼炭火於暖室出汗涌吐三法併行至七日而
瘥

一人稚年氣弱於氣海三里穴時灸之及長成熟厥頭痛雖嚴冬喜朔

風吹之。其患輒止。少處煖。及近烟火。其痛即作。此灸之故也。東垣治以清上瀉火湯。尋愈。

一室女近窗做女工。忽患頭疼甚。諸藥不效。一醫徐察之。窗外畜鷲。知為鷲虱飛入耳內。咬而痛也。以稻桿煎濃汁灌之。虱死而出。遂不痛。

一人患頭風。自顛下左右。有如兩蚯蚓徐行入耳。復從耳左右分上頂。左過右。右過左。頂上起疙瘩二塊。如猪腰然。前後腦如鼓聲。瑟瑟然。冷痛甚。須重綿帕裹包。疼甚。四肢俱不為用。醫效罔奏。後得一方。用四物各一錢。皂角刺一錢。萆薢四兩。猪肉四兩。水煎去藥渣。將汁同肉食之。服至二十劑。減十之三。四十劑。減十之六。百劑乃安。江氏曰。此非頭風也。其人曾患癩瘡。頭塊墳起。皆輕粉結毒。故萆薢為君。四物養血。皂刺為引。其毒深。故多服。取效也。

震按。萆薢解當是土茯苓。廣筆記治癩瘡頭痛方更佳。但治病必以脈為憑。丹方有效。有不效。且錄之不勝錄。右四條雖不載脈。然證頗疑難。法

殊整暇定當入選他如江篁南治從嬪以補中益氣加川芎細辛蔓荊子翟文炳治陸母先與抑青丸繼以補中益氣二條祇敘見證未可摹倣且陸母證甚繁雜抑青丸一服而愈其然豈其然乎又南唐書載其相馮延巳苦腦中痛累日不減太醫令吳延紹密詰厨人曰相公平日嗜何等物對曰多食山雞鷓鴣廷紹曰吾得之矣投以甘豆湯而愈蓋山雞鷓鴣皆食烏豆半夏故以此解其毒震按此與名醫錄所載王夫人面上忽生黑斑點日久滿面皆黑識者云病因日食斑鳩而斑鳩嘗食半夏苗故中其毒乃用生薑一斤搗汁將滓焙乾卻用生薑汁煮糊丸服一月愈其博物同而用藥之辛甘溫平不同矣

心脾痛

羅謙甫治江淮漕運使崔君長子年二十五體豐肥奉養膏粱時有熱證因食涼物服寒藥至元庚辰秋久瘧不愈醫用砒霜截藥新汲水送下禁食熱物瘧不止反加吐利腹痛腸鳴時腹胃脘當心而痛屢醫罔效延至

次年四月因勞役煩惱前證大作羅診之脉弦細而微手足稍冷面色青黃不澤情思不樂惡煩冗食少微飽則心下痞悶嘔吐酸水發作疼痛冷汗時出氣促悶亂不安須人額相抵而坐內經云上氣不足頭為之苦傾中氣不足溲便為之變腸為之苦鳴下氣不足則為痿厥心悅又曰寒氣客於腸胃之間則卒然而痛得灸乃已灸者熱也非甘辛大熱之劑則不能愈為製扶陽助胃湯炮乾薑一錢五分人參草豆蔻灸草官桂白芍各一錢陳皮白朮吳茱萸益智各五分炮熟附子二錢薑棗煎服三貼大勢皆去痛減過半至秋先灸中脘三七壯以助胃氣次灸氣海百餘壯生發元氣滋榮百脉以還少丹服之則善飲食添肌肉明年春灸三里二七壯乃胃之合穴也亦助胃氣又引氣下行春以芳香助脾胃氣湯加白檀香戒以懲忿窒慾慎言節食一年而平復

滑伯仁治一婦人盛暑洞泄厥逆惡寒胃脘當心而痛自腹引脇轉為滯下嘔噦不食醫以中暑霍亂療之益劇脉三部俱微短沉弱不應呼吸曰

此陰寒極矣。不亟溫之，則無生理。內經雖曰：用熱遠熱。又曰：有假其氣則無禁也。於是以前薑附溫藥服之七日，諸證悉去。再以丸藥除其滯下而安之。

丹溪治一人，以酒飲牛乳，患心疼年久，飲食無礙，雖盛夏飲食身無汗，醫多以丁附治之，羸弱食減，每痛以物拄之，脉遲弱，弦而濇，大便或秘結，或泄，又苦吞酸，時七月，以二陳湯加苓連、白朮、桃仁、郁李仁、澤瀉，每旦服之，屢涌出黑水，若爛木耳者，服之二百餘貼，脉濇漸退，至數漸添，純弦而漸充滿，時冬暖意，其欲汗而血氣未充，以參、芪、歸、芍、陳皮、半夏、甘草服之，痛緩，每旦夕一二作，乃與麻、黃、蒼朮、芍、歸、甘草等藥，繞下咽，忽暈厥，須臾而甦，大汗痛止。

一婦春末，心脾疼，自言腹脹滿，手足寒過肘膝，須綿裹，火烘胸畏熱，喜掀露風涼，脉沉細濇，稍重則絕，輕似弦而短，渴喜熱飲，不食，以草豆蔻丸三倍加黃連、滑石、神曲為丸，白朮為君，茯苓為佐，陳皮為使，作湯下百丸。

服至二劑而愈。

震按二條脉象俱似虛寒而丹溪以溼熱治者。上條屢服熱藥不效。且年久飲食無礙。大便或秘或泄。知其為停飲也。此條以胸前畏熱喜涼。及脉沉細濇為據。所為稍重。則絕者。以細濇故也。與潤大而軟之為虛寒不同矣。故加黃連滑石。徧觀丹溪案。凡脉弦細濇者。俱不用溫藥。想其閱歷多而認得真也。又一婦心與頭互換作痛。用清空膏而愈。亦云瘦弱脉濇。以四物加桃仁酒芩陳皮甘草調理。

盧天民治一婦。四月間多食青梅。得病。日間胸膈中大痛如刀錐。至晚胸中痛止。而膝脛大痛。蓋痰飲隨氣升降故也。一醫作胃寒治。與薑桂丁沉。萸撥烏附之類。病反劇。加口渴。小水淋漓。盧診其六脉洪數而滑。知為痰病。令熬竹瀝服。三日。口不渴。小水亦不淋漓。但胸中與膝互痛如舊。用蘿蔔子研汁。小半碗吐痰半升。至夜痛尤甚。而厥。此引動其猖狂之勢也。再用吐法不效。一日清晨。以藜蘆末一錢麝香少許。酸漿水調服。始大吐。其

痛如脫調理而安。

震按此條與丹溪治許文懿公案仿佛。許因中脘有食積痰飲續冒寒溼。抑遏經絡。氣血不行。津液不通。痰飲上升。則為脾疼。下降。則為脘痛。須瀉泄之。乃以甘遂末一錢。入猪腰子內煨食之。連泄七行。次日脘痛止。而足能步。復又大作嘔吐。不食。煩躁。氣弱。不語。朱謂多年鬱結。一旦泄之。徒引動其猖狂之勢。隨連用吐劑。大吐之。更以朴硝滑石黃芩石膏連翹等一觔。濃煎冷飲。四日盡。四觔。後又腹微滿。二便閉。脉歇。至於寅卯時。未謂卯酉為手足陽明之應。此胃與大腸積滯未盡。二日內令服紫雪。至五兩。得稍安。又小溲閉痛。飲以蘿蔔子汁半盃。得吐立通。又小腹滿痛。不可捫摸。神思不佳。以大黄牽牛作丸。連下之。得如爛魚腸。柏油條者。而神思漸安。脉乃不歇。自病半月。不食。不語。惟脉皆平常。弦大。次年行倒倉法全愈。朱公此案。宛似戴人較之花谿。更加險峻。故節錄附此。又一童子久瘧初愈。心脾疼。六脉服痛稍減時。氣口緊盛。餘皆

弦實而細意其宿食以小胃丹十餘粒服十二次藥尤狠恐難學

游以春治一嫠婦年三十餘忽午後吐酸水碗許至未時心前作痛至申時痛甚暈去不省人事至戌方甦每日如此屢治不效游至用二陳下氣之劑亦不效熟思之忽憶鍼經有云未申時氣行膀胱想有瘀血滯于此經使然遂用歸尾紅花各三錢乾漆五錢煎服吐止痛定暈亦不舉次日復進一貼第三日加大黃桃仁飲之小便去凝血三四碗而痊

震按先吐酸水然後心前作痛醫者必認胃病而以痰氣兼溼熱治否則兼寒溼治耳乃從所發之時想到氣行於小腸膀胱果得小便去凝血而愈內經所謂病在上求之下也豈庸手所能辦

孫東宿治查良川怒後食魚骨哽喉中即以饅頭粽肉等壓之骨雖下便覺胸膈不快又服消骨藥兩日胸膈脹痛殊甚飲食悉從背後而下惡寒發熱六脉弦數因思骨哽之後用硬物壓之傷其胃腕必有瘀血停蓄膈間將食管逼在背後故飲食覺從背後下也今但消去瘀血庶使食管復

元以五靈脂為君。山查、延胡、桃仁、枳殼為臣。赤芍、丹皮、香附、山梔、仁柴、胡石、葛蒲為佐使。水煎入韭菜汁一杯飲之。大便瀉一次。即胸膈寬快。痛減大半。飲食乃從右邊而下。右邊喉胸稍痛。吞物甚艱苦。吐出痰皆血腥氣。改以山梔、赤芍、歸尾、桃仁、劉寄奴、五靈脂、丹皮、穿山甲煎入韭菜汁服之。兩貼全瘳。

震按同一瘳。血致痛上條難辨。此條易認。因硬物吞壓。啟其思路耳。然想到食管逼在背後。思路巧極。

欽溪吳入峰之室。胃脘作痛。兩脇脹急。痛一陣。則汗出一番。兩顴紅。唇口亦紅。飲食湯水飲之立吐。不受者三日夜矣。孫東宿診之。兩寸脈洪大。兩尺沉微。孫以井水半碗。滾湯半碗。名曰陰陽湯。用此調元明粉一錢五分。服之。不惟不吐。痛減半矣。少頃大便行三次。因食豆腐及粥太早。而痛復作。唇臉皆紅。此必有蟲。故如是也。與桂枝白芍甘草烏梅川椒五靈脂杏仁水煎痛已定。其大半再與蒼朮厚朴山查枳實茯苓延胡香附一貼。

全止。但心背皮膚外疼。不能着席而睡。以芎歸苓朮橘半厚朴腹皮香附甘草調養全愈。

震按陰陽湯調元明粉亦一醫痛急着續用三方皆純正可宗。

給諫章魯齋暑月心中大痛服香需飲痛勢轉增李士材曰寸口弦急痰食交結也服香砂二陳湯兩貼痛雖略減困苦煩悶更以胃苓湯加半夏二錢大黃三錢下黑屎數枚痛減三四仍以前湯用大黃四錢下膠痰十數碗始安。

章生公在南都應試八月初五心口痛甚至不能飲食李診之寸口濇而軟與大劑歸脾湯加人參三錢官桂一錢生公曰痛而驟補實所不敢得無與場期礙乎李曰第能信而服之可以無礙恐反投破氣之藥其礙也必矣遂服之不踰時而痛減更進一劑并飲獨參湯兩日而愈場事獲竣。

王金壇曰予讀中祕書時館師韓敬堂先生常患脇痛診其脉洪大而濇

予用山梔仁紅麴通草麥芽香附芎歸煎湯加薑汁韭汁童便竹瀝飲之而止。一日勞倦忍飢痛大發亟邀予至卧房問曰晨起痛甚不得待公服家兄藥藥下咽如刀割痛益甚不可忍何也予曰得非二陳平胃烏藥紫蘇之屬乎曰然曰是則何怪乎其增病也夫勞餓而發飽逸則止知其虛也飲以十全大補湯一劑而痊。

震按李公二案一用峻下一用大補皆以脉為憑王公一案先用行血通氣後用十全大補先憑於脉後憑於因乃知丹溪以脉因證治名書扼其要而病無遁情也。

李時珍治一人素飲酒因寒月哭母受冷遂病寒中食必佐以薑蒜至夏酷暑又多飲水兼懷怫鬱因病右腰一點脹痛牽引右脇上至胸口則必欲卧發則大便裏急後重頻欲登園小便長而數或吞酸或吐水或作瀉或陽痿或厥逆或得酒少止得熱少止但受寒食寒或勞役或入房或怒或飢即發止則諸證泯然甚則日二三發服溫脾勝溼滋補消導藥皆微止

隨發時珍思之。此乃飢飽勞逸內傷。元氣清陽陷遏。不能上升。所致。遂用升麻葛根湯。合四君子。加柴胡。蒼朮。黃芪。煎服。仍飲酒。一二杯。助之。其藥入腹。則覺清氣上行。胸膈爽快。手足和暖。頭目精明。諸證如掃。每發一服即止。若減升麻葛根。或不飲酒。則效便遲。大抵人年五十以後。其氣消者多。長者少。降者多。升者少。秋冬之令多。春夏之令少。若稟受弱。而有前諸證者。並宜此藥活法治之。

震按此種病。近來頗多。每從右脇脹痛。至中脘。或吞酸。或吐水。或作瀉。肢冷不食。予每以二陳湯。加香附。白芍。蒼朮。良薑。草蔻。胡盧巴等服之。頗效。但易於發。發久則漸重。欲其不發。殊苦無策。觀此病飲酒少止。得熱少止。似有間可尋矣。乃不用溫藥。而以升麻葛根二朮參芪升陽益胃。實得力于東垣。惜不載脈象為恨。然云每發一服即止。則亦不能不發也。

一婦人胃脘痛。勺水不入。寒熱往來。或從火治。用苓連梔檳。或從寒治。用

薑桂茶羹展轉月餘形體羸瘦六脉弦數幾于斃矣高鼓峰曰此肝痛也非胃脘也其病起於鬱結生火陰血受傷肝腎枯燥迫成痛醫復投以苦寒辛熱之劑胃脘重傷其能瘳乎急以滋腎生肝飲與之一晝夜盡三大劑五鼓熟寐次日痛定覺饑矣再用加味歸脾湯加麥冬五味十餘劑而愈

震按江應宿治一男子心脾痛六脉弦數曰此火鬱耳投薑汁炒黃連山梔瀉火為君川芎香附開鬱陳皮枳殼順氣為臣反佐以炮薑從治一服而愈再與平胃散加薑炒黃連山梔神麴糊丸服永不發與此案脉同治異可合參之嘗閱臨證指南治脘痛大半是肝邪犯胃或挾痰或挾痰或兼寒或兼熱再辨胃之虛實肝之寒熱而錯綜參伍以為治即紫金丹枯樓薤半桂枝湯瀉心和枳實薑汁異功加歸芍總皆古法不立新方其用石決明桑寄生阿膠生地杞苓石斛等以養胃汁即鼓峰滋腎生肝法也其用蘇木人參桃仁歸尾鬱金赤芍琥珀羌蔚以紅

棗肉丸。即孫東宿治。查良川法也。惟緩逐其痰。用蜚螬。麝蟲。靈脂。各一兩。桃仁二兩。桂枝。尖。生用五錢。蜀漆炒黑。三錢。老韭白根搗汁。九。以蟲豸入血搜逐。及諸配合之藥。為最巧。又陽微濁凝。用炒川椒一錢。炮乾薑錢半。炮黑烏附各三錢。大劑辛熱驅寒。不加監制之藥。為最猛。惟此二方有大力量。然指南全部。亦僅數年之醫案。豈足概先生之一生。自刊行以來。沾溉後學。被其惠者良多。而枵腹之輩。又藉此書易於勦襲。每過一證。即抄其辭句之精華。及藥方之纖巧。而平穩者。錄以應酬。竟可懸壺。無論大部醫書。畏如望洋。即小部醫書。亦東之高閣。惟奉指南樂其簡便。而不知學之日益淺陋也。嗟乎。豈指南誤人乎。抑人誤指南乎。

附薛生白先生治嘉善一人。胃腕痛。胸膈痞塞。向作痰治。氣治均不效。有前輩與控涎丹服數日。大瀉不止。上稍舒而體倦甚。遂進六君子湯。數貼後。精神復而痛脹如前矣。薛用千金子煎湯磨沉香木香檀香降香丁香服一月而全愈。服時亦作瀉。薛云無妨。故守其法而收功。

杭州議敘部郎葉醴醇。少年時脫痛不能食。身極羸瘦。上海杜良一先生用綱目厚朴煎丸。每晨以人參二錢煎送丸。藥三錢服一月而痛除根。食大進。身遂肥胖。

厚朴煎丸 厚朴去皮剉用生薑二斤連皮切片以水五升同煮乾去薑焙朴以乾薑四兩甘草二兩再同厚朴以水五升煮乾去草焙薑朴為末用棗肉生薑同煮熟去薑搗棗和丸梧子大每服五十丸

腹痛

丹溪治一人六月投淵取魚至秋深雨涼半夜小腹痛甚大汗脉沉弦細實重取如循刀責責然與大承氣湯加桂二服微利痛止仍連日於中酉時復痛堅硬不可近每與前藥得微利痛暫止於前藥加桃仁泥下紫黑血升餘痛亦止脉雖稍減而責責然猶在又以前藥加川附子下大便五行有紫黑血如破絮者二升有餘又傷食於酉時復痛在臍腹間脉和與小建中湯一服而愈。

震按小腹痛甚。大汗。脉如循刀責責。昧者必認為真臟脉矣。否則認其病因是寒。惟用桂附耳。丹溪連以溫藥下之。殊不可及。最難者。痛止復作。不改前方。陡加桃仁。迨瘀下痛止。仍不改前方。又加附子。至愈後傷食復痛。忽變前方。而用建中。總由指下認得真。故攻補毫無疑惑也。下條虞案受寒為重。又誤於寒下。故先投溫補及艾灸。而後進溫下之藥。與前案稍別。然皆確切不移。彼此難換。若認脉不清。必至兩悞。

虞天民治一人。壯年寒月。入水網魚。飢食冷粥。腹大痛。二晝夜不止。醫用大黃丸。大承氣。下糞水而痛愈甚。診其六脉沉伏而實。面青黑色。虞曰。此大寒證。及下焦有燥矢。作痛。先與丁附治中湯一貼。又灸氣海穴二十一壯。痛減半。繼以巴豆沉香木香作丸。如綠豆大。生薑汁送下。五粒。下五七次而愈。又一婦年五十餘。小腹有塊。作痛二月餘。一醫作死血治。與四物加桃仁等藥。不效。又以五靈脂延胡索乳香沒藥三棱莪朮等丸服。又不效。其六脉沉伏。兩尺脉絕無。虞曰。乃結囊在下焦。作痛耳。非死血也。用金

城稻、藁、燒灰、淋濃汁一盞服之。過一時許，與枳實導滯丸一百粒，催之下。黑糞如梅核者，碗許，痛遂止。後以生血潤腸之藥，十數貼，調理平安。

震按尺脈沉實，則為下焦結糞。今兩尺絕無而斷結糞，又見取脈之巧，非出一途。若死血則脈必澹，前已歷載多案矣。

汪石山治一人，年五十餘，瘦黑，理疎，忽腹痛，午後愈甚。醫治以快氣之藥，痛益加。乃曰：午後血行於陰分，加痛者，血滯於陰也。四物加乳沒服之，亦不減。汪診之，脈浮細而結，或五七至一止，或十四五至一止。經論止脈，漸退者生，漸進者死。今止脈頻則反輕，疎則反重，與脈經實相矛盾。汪熟思少頃，曰：得之矣。止脈疎而痛甚者，以熱動而脈速頻，而反輕者，以熱退而脈遲，故耳病屬陰虛，火動無疑。且察其病起於勞，欲勞則傷心，而火動，欲則傷腎，而水虧。以參芍補脾為君，熟地歸身滋腎為臣，黃芩知母麥冬清心為佐。山查陳皮行滯，為使人乳童便出入，加減惟人參加至四五錢，遇痛進之，則愈。或問諸痛與瘦黑人，及陰虛火動，參芪在所當禁，今用之，顧效何取？汪

曰諸痛禁用參芪者。以暴病形實者言耳。若年高氣血衰弱不用補法。氣何由行。痛何由止。經曰壯者氣行則愈是也。

震按汪公之察病情講病因精細無比。故參芪歸地麥冬知檠乳瀉並非腹痛門所列之方。而竟能奏效。愚者遇某病即於某病門檢方以治。一望迷津。何嘗得濟。況諸書所載方法。此有彼無。彼詳此略。將恃何種為寶筏耶。

一婦人年近五十。病腹痛。初從右手指冷起。漸上至頭頭如冷水澆灌。而腹大痛。則偏身大熱。熱退則痛止。或過食或不食皆痛。每常或一年一發。近來二三日一發。遠不過六七日。醫用四物加柴胡香附不應。更醫用四君木香枳櫛亦不應。又用二陳加紫蘇豆蔻。又用七氣湯等劑皆不應。汪診脉皆微弱。似有似無。或一二至一止。或三五至一止。乃陽氣大虛也。獨參五錢。陳皮七分。煎服十數貼而愈。夫四肢者諸陽之末。頭者諸陽之會。經曰陽虛則惡寒。又曰一勝則一負。陽虛陰往乘之則發寒。陰虛陽往乘之則

發熱。今指稍逆。冷上至於頭。則陰勝陽。負可知矣。陽負。則不能健運。而痛大作。痛作。而復熱者。物極則反也。及其陰陽氣衰。兩不相爭。則熱歇痛亦息矣。仲景曰。血虛氣弱。以人參補之。故用獨參湯。而數年之痛頓愈。

震按此條脉象。較上條為易認。然用參不用附。豈以其大冷後發大熱。宜補不宜溫耶。學者亦當體會之。

一人面色蒼白。年四十六。素好酒色。犬肉三月間。因酒兼有房事。遂病。腹左痛甚。後延腹右。續延小腹。以及滿腹皆痛。日夜叫號。足不能伸。卧不能仰。汗出食阻。自用備急丸。利二三行而隨止。痛仍不減。汪診其脉皆細。駛右脉頗大於左。獨脾脉弦而且滑。扶起診之。右脉亦皆細數。恐傷酒肉。用二陳加芩查麩。藥進之不效。再用小承氣湯。亦不利。蜜煎導之。仍不利。乃以大承氣湯。利二三行。痛減未除。令其佳藥。只煎山查湯飲之。次日煩燥嘔惡。渴飲涼水。則覺惡止爽快。詰朝診脉。皆隱而不見。四肢逆冷。煩躁不甯。時復汗出。舉家驚愕。疑是房後陰證。擬進附子理中湯。汪曰。此治內寒。

逆冷也。活人書云：四逆無脈，當察證之寒熱。今觀所患，多屬於熱。況昨日脈皆細數，面色近赤，又兼酒後而病，六脈雖絕，蓋由壯火食氣也。四肢者，諸陽之末氣，被壯火所食，不能營於四肢，故脈絕而逆冷也。此類傷暑之證，正合仲景所謂熱厥者多，寒厥者少，急用大承氣湯下之之例。向雖下以大承氣，其熱尚未盡，難以四逆湯證與比。今用附子熱藥，甯不助火添病耶？如不得已，可用通脈四逆湯，尚庶幾焉。以其內有童便、豬膽汁、監制附毒，不得以肆其虐也。連進二服，脈仍不應，逆冷不回，渴飲煩躁，小便不通，糞澹反頻，腹或時痛，更進人參白虎湯二貼，躁渴如舊，更用參朮各三錢、茯苓、麥冬、車前各一錢、五味當歸各五分，煎一貼，脈漸見如蛛絲。汪曰：有生意矣。仲景論脈絕服藥微續者生，脈暴出者死是也。左手足亦略近和，不致冰人。右足手逆冷如舊，但口尚渴，便尚澹，一日夜約十餘度，小便不通。汪曰：渴而小便不利者，當利其小便，遂以天水散冷水調服三四劑，不應，再以四苓散加車前山梔煎服二貼，小便頗通，但去大便而小便亦

去不得獨利。汪曰：小便未利，煩渴未除，盡由內熱耗其津液也。大便尚溏者，亦由內熱損其陽氣，陽氣不固而然也。遂用參朮各三錢，茯苓一錢五分，白芍車前門冬各一錢，山梔七分，五味五分，連進數服。至第九日，逆冷回，脈復見，諸證稍減，漸向安。

震按此證反覆甚多，所用之方又皆重劑，然寒熱互用而卒能以補收功者，因其身不熱，神不昏，與傷寒溫疫有別，故可從容挽救也。大抵腹痛由於停食，而房後元氣必虛，連下之則虛極，故逆冷脈絕，通脈四逆湯非悞。白虎湯殊悞，賴有人參，設不用人參，此證早難活也。

王中陽治一燕人，久患冷氣，滿腹上攻下注，大痛不堪，痛陣擁上，即吐冷涎而止。一日一作，飲食不進，遂成骨立，屢用溫補不效。王診之，六脈弦長勁急，兩畔別有細脈，沸然而作，狀如爛綿。曰：此必胸膈有臭痰，在內病者曰然。眾醫皆作冷氣，因補治下元，日久無效。自覺胸中痞悶，今聞此說，令我大快，遂投滾痰丸，臨睡服之。夜半吐黑綠冷涎，敗水無數，再服七十九

其病如脫。以六君子調理而愈。

震按王隱君治病不曰痰即曰火可作戴人之法嗣但腹痛因痰誠有之此種脉象更要留心

薛立齋治太守朱陽山因怒腹痛作瀉或兩脇作脹或胸乳作痛或寒熱往來或小便不利飲食不入嘔吐痰涎神思不清此肝木乘脾土用小柴胡加山梔炮薑茯苓陳皮合左金一劑即愈

震按立齋治腹痛凡兼胸脇作脹嘔吐不食或吞酸噯腐或手足厥冷皆謂肝木乘脾多用補中益氣及六君子間有吞左金丸者或香砂六君子加木香炮薑吳茱萸其載脉皆曰弦緊弦長或弦洪弦數何均用參朮不可易轍取

孫東宿治吳勉齋年近五十有腹痛疾或作或止性極急多躁多怒今痛在當臍不問晝夜市里醫者為下之已五日大便雖瀉痛則尤甚飲食不進手足清冷形神俱倦脉僅四至重按則伏而有力此由攻剋太過寒涼

傷脾。脾虛則中氣不運。積反凝滯。以故大便雖瀉。而積不行。痛終不減也。治當建立中氣為主。中氣一回。痛當立止。先與王海藏五神丸二錢。滾水送下。以止其痛。此丸補接元氣。安和五臟。升降陰陽。極有神應。故名五神。再用小建中湯。調肝養脾。蓋臍下乃肝經部位。惟此湯乃對證劑也。但以桂心換桂枝。加香附。服後痛止。次日進粥太頻。且食鴨汁。撼動餘積。腹又作痛。且加脹滿。面有浮氣。裏急後重。與四平丸而漸定。外以二陳加香附。砂仁。蒼朮。山查。腹中始覺寬快。三日無恙。又縱恣口腹。大啖過飽。腹中大痛。欲吐。之則食已下。高欲瀉。之則食未入腸。自喊叫云。可取木香。檳榔丸。大承氣湯。急與我下之。雖死無憾。孫曰。據痛雖甚。腹則不堅。顧今日適屆冬節。禮曰。先王於至日閉關。安靜以養微陽。安敢以大寒峻劑。而汨天和乎。設不得已。只須柏樹。東行根。上白皮。長流水煎飲之。果瀉三五行。痛減大半。再與小建中湯和之。痛又旋減。惟臍下尚不脫然。常常以熱手重慰之。大便欲行。及至廁。則又不解。知其血少而氣不調。用熟地三錢。白芍一錢。

杏仁二錢。烏藥一錢。木香五分。煎服。下黑糞甚多。十年腹痛沉疴。從此再不復萌。

東宿曰。一染匠婦。腹痛兩月矣。或以為寒。為熱。為氣。為虛。為食積。為蟲。愈醫愈痛。一醫與大膏藥一個。滿腹貼之。痛益劇。欲搗去膏藥。即粘牢不可起。火熨油調。百計不能脫分寸。如生在肉上。相類無可奈何。買舟就診。及抵岸。而儘力攙扶。不能動一步。予往視之。見其面色蒼黑。手上皮膚燥若老松樹皮。六脉皆洪數。叩其不能舉步之由。婦曰。非力弱不能行。乃左腳不可動。動即痛。應于心。是以一步不能舉也。予思色脉皆非死候。胡治而益劇。此必腸癰。左腳莫能舉。是其徵也。與營衛返魂湯。加金銀花。為君。酒水各半煎。一貼痛稍減。二貼下黑臭膿半桶。腹上膏藥自脫。由熱去。而膏脫也。痛遂全減。調理而安。

震按前案用藥巧。此案審病巧。俱可啟迪後學。

繆仲瀄曰。包海亭夫人患腹痛。連少腹。上至心。日夜靡間。百藥不效。予診

其脉兩寸關俱伏獨兩尺實大按之愈甚詢知其起自暴怒風木鬱于地中投以川芎上柴胡中升麻下下咽噎氣數十聲痛立已已而作喘予知升之太驟也以四磨飲與之遂平。

震按風木鬱於地中宜用逍遙散去白朮加香附鬱金為正治或參入川棟半夏橘紅牡蠣等藥茲因兩尺實大按之愈甚故用三樣升提藥然已升之太驟而作喘四磨飲降得恰好。

俞嘉言治葉茂卿男出痘未大成漿其殼甚薄兩月後尚有着肉不脫者一夕腹痛大叫而絕喻取梨汁入溫湯灌之少甦頃復痛絕灌之又甦遂以黃芩二兩煎湯和梨汁與服痛止令製膏子藥頻服不從其後忽腹大無倫一夕痛叫小腸突出臍外五寸交紐各二寸半如竹節壺頂狀陽物絞摺長八九寸明亮如燈籠奇怪可畏喻以黃芩阿膠二味日進十餘劑三日後始得小水五日後水道通利臍收陽縮而愈門人因詢其義答曰夫人身之氣全關於肺肺清則氣行肺濁則氣壅肺主皮毛痘不成漿肺

熱而津不行也。穀着於肉，名曰甲錯。甲錯者，多生肺癰。癰者，壅也。豈非肺氣壅而然歟？腹痛叫絕者，壅之甚也。壅甚則并水道亦閉。是以其氣橫行於臍中，而小腸且為突出。至於外腎弛長，尤其刺事矣。吾以黃芩、阿膠、清肺之熱，潤肺之燥，治其源也。氣行而壅自通，源清斯流清矣。緣病已極中之極，惟單味多用，可以下行，取效。故藥止二味，而奏功甚捷耳。試觀禽畜之類，有肺者有水，無肺者無尿，故水道不利而成腫滿。以清肺為急，即此義通之。後人以五苓、五皮、八正等方治水者，總之未悟此旨。至於車水放塘，種種劫奪膀胱之劑，則殺人之事矣，尚可用歟。

周慎齋曰：一人年二十餘，房事不節，因食酒店飲食，遂火挾臍起，上入胸膈，腹內痛，外皮抽進。如有物閉住胸中，用消導者有之，用溫補者有之，服藥愈多而病愈凶。自分以為必死，予診之，思相火自下衝上，直至于頭面。今火起于臍，至胸而止，乃因色慾過度，真陽不足。丹田有寒也，作痛者脾虛有寒，土無火生也。用烏藥二錢，以製附子一枚，每用附子三分，水煎服。

蓋附子扶陽烏藥破滯。只此一味煎湯極清。清則下行。甚速。故五日見效。服附子百枚而痛自愈。

震按喻公以黃芩阿膠日進十餘劑。周公以烏藥製附子。每次用三分。皆五日見效。可稱絕對。然服附子至百枚。以每次用三分計之。功程毋乃太遠乎。

腰痛

東垣治一人。露宿寒溼之地。腰痛不能轉側。脇搐急作痛。月餘。腰痛論云。皆足太陽足少陰血絡有凝。血作痛。間有一二證。屬少陽膽經外絡。脉病。皆去血絡之凝。乃愈。經云。冬三月禁針。只宜服藥通其經絡。破血絡。中敗血。以漢防己防風各三分。炒麴獨活各五分。川芎柴胡肉桂當歸炙草蒼朮各一錢。羌活一錢五分。桃仁五粒。酒煎服愈。

震按此條雖云去血絡中瘀血。其實溫寒勝溼之藥為多。治其得病之因也。

丹溪治徐質夫年六十餘因墜馬腰疼不可轉側六脉散大重取則弦小而長稍堅朱以為惡血雖有未可驅逐且以補接為先遂令煎蘇木人參黃芪芍歸陳皮甘草服至半月後散大漸斂食亦進遂與熟大黃湯調下自然銅等藥一月而安。

震按跌傷有瘀似宜先逐瘀而後補丹溪則以年之老脉之散大反先補而後逐瘀是其學問之高也昧者必以為補住惡血懼不敢補則盡力逐之瘀終不去而變端起矣損傷且然况內病乎觀此案及治葉先生痢疾案而知補住邪氣補住惡血之為謬誤也大抵元氣果虛則補藥惟元氣受之而或邪或瘀不相干涉若元氣不虛則補藥為邪助長為瘀增痛誠非所宜要在能辨其虛與不虛耳

劉立之治一婦人患腰痛已歷年諸藥不效劉診之曰病雖危殆然一夕可安主人訝焉乃請其藥答曰不須藥但用鉛粉二三十兩壯士五人犬鈴五七枚足矣於是主家悉備劉命撤去床帳幔移置屋中以米飲和鉛

粉置病婦腰周迴令其舒卧壯士一人搖鈴繞床急走使其聲不絕人倦即易之至夜半後其婦稍能自起立既而腰痛頓釋舉家拜云師神醫也願聞其意劉云此病因服水銀所致水銀客腰窳間不能出故疼不已今用鉛粉粉乃水銀所化為金之母取金音以母呼子母子合德出投粉中則病愈矣。

震按此法異想天開較之葛可久浴以銀湯坐以川椒者各臻神化並絕濟攀。

李士材曰徽州太學方魯儒精神困倦腰膝異痛不可忍皆曰腎主腰膝而用桂附綿延兩月增四肢痿軟腰膝寒冷遂恣服熟藥了無疑懼比予視之脉伏于下極重按之振指有力因思陽證似陰乃火熱過極反兼勝己之化小便當赤必畏沸湯詢之果然乃以黃檗三錢龍膽草二錢苓連梔子各一錢五分加生薑七片為向导乘熱頓飲移時便覺腰間暢快三劑而痛若失矣用人參固本丸日服二兩一月而痊安。

震按此與景岳治董翁腰痛相同。但張案則脉洪滑而小水不通。故用大分清飲。倍加黃蘗膽草。小水通而腰痛頓止。

祝茹穹治張修甫腰痛重墜。如負千金。惟行房時不見重。服補腎等丸總不效。祝曰。腰者腎之府。腎氣虛。斯病腰。然何以行房時不見重。必瘀血滯之也。故行房時。腎搖而血行。行即不瘀。遂不見其重也。以黃蘗知母烏藥青皮桃仁紅花蘇木穿山甲木通各一錢。甘草五分。薑棗煎二劑而愈。

震按瘀血腰痛。古人原有治法。而想到行房時腎搖。血即不瘀。豈非明哲乎。然行瘀多用肉桂。此反用知蘗者。豈於脉中見相火之強耶。

孫東宿曰。吳東星冒暑。應試落第。而怏怏。因成瘧。自中秋延至十月。瘧雖止。而腰痛甚。且白濁咳嗽。肌肉大削。藥劑亂投。如大羌活湯。地黃湯。及連檠桂附參茸等。皆用過。痛劇欲死。叫撼四鄰。予脉之。左弦細。有滑大。俱六至。口渴眼赤。予知其昔患楊梅瘡。餘毒尚伏。經絡適因瘧後。氣血不足。舊毒感動。故痛而暴也。以歸芍甘草牛膝。苡仁木通。白蘗皮。鈎藤。用土茯苓。

四兩煎湯代水煎藥。數服而痛止。噉緩。乃以酒後犯房。次日腰如束縛。足面亦疼。左眼赤。小水短。足底有火。從兩跨直冲其上。痛不可言。予於方去木通白蘚土茯苓。加石斛紅花生地黃藥。調理三日。證無進退。時值祁寒。因大便秘結。誤聽人言。用元明粉。一日夜服至兩許。便仍不行。而腰痛愈猛。兩足攣縮。氣息奄奄。面色青慘。自覺危急。診之。六脉俱伏。痛使然也。予曰。君證雖熱。便雖燥。但病不在腸胃。而在經絡。筋骨間。徒瀉腸胃。何益。且閉藏之月。誤瀉。則陽氣虧乏。來春無發生根本矣。今四肢拘縮。腰跨痛極者。由天寒而經絡凝澁也。寒主收斂。法當溫散寒邪之標。使痛定。然後復治其本。乃用桂心杜仲炙甘草蒼朮破故紙五加皮連與二劑。痛定而四肢柔和。飲食始進。予曰。標病已去。顧今嚴寒。不可治本。須俟春和為君。拔去病根。渠不信。任他醫。用滋陰降火。久而無效。至次年三月。予乃以煨腎散進。大瀉五六度。四肢冰冷。舉家大恐。予曰。病從此去矣。改進理脾藥。數貼。神氣始轉。腰跨柔和。可下床舉步矣。蓋此係楊梅瘡餘毒。伏於經絡。豈補劑。

所能去哉。予故先為疎通溼熱。方用補劑收功也。後仍以威靈仙末子。二錢入猪腰子內煨熟食之。又瀉一二度。病根盡拔。改用熟地歸芍。以仁牛膝黃檗丹參龜板調理全安。

震按此案病情反覆。孫公能隨其病機。曲折以赴之。就所錄者。已有七次治法。惟始終彙載。方知其中間有效有不效。而終底於效。乃可垂為模範。苟逸其半而存其半。則不知來路之淵源。未明結局之成敗。何以評薦其是非乎。因不禁慨然於臨證指南矣。

喻嘉言治張令施之弟。傷寒壞證。兩腰僂廢。卧床徹夜痛叫。百治不效。喻診其脉亦平順。痛則比前大減。乃曰。病非死證。但恐成廢人矣。此證之可以轉移處全在痛。如刀刺尚。有邪正互爭之象。若全然不痛。則邪正混為一家。相安於無事矣。今痛覺大減。實有可憂。因諦思病情。必由熱邪深入兩腰血脉久閉。不能復出。止有攻散一法。而邪入既久。正氣全虛。攻之必不應。乃以桃仁承氣湯多加肉桂附子。二大劑與服。服後即能強起。再為

丸服至旬餘全安。此做仲景治結胸證附子瀉心湯法。結胸者在。上之證。氣多故附子與大黃同用以瀉心。腰傷者在。下之症。血多故合桃仁肉桂以散腰間之血結也。後用此法治江生。二劑而愈。

震按此人無火象見。故可多加桂附。若不受熱藥則奈何。試為西昌廣其義。如大黃蟾蟲丸。復元活血湯。或可為桂附分途之法乎。再如黎峒丸。山羊血石羊膽與針砭法。皆可一致思也。

背痛

汪石山治一人。年踰三十。季夏日午行房。多汗。晚浴。又近女色。因患白濁。醫用胃苓湯。加右眼作痛。用四物湯入三黃服之。睡醒口愈。加苦。又加左膝腫痛。仲冬不藥。濁止。漸次延至背痛。不能轉側。日輕夜重。嚏則如繩索撮。腰脇痛楚不堪。呵氣亦應背痛。時或夢遺。次年正月。汪診之。脉皆緩弱無力。脾虛可知。左脉滑者。血熱也。遂以參芪各二錢。苓朮歸身麥冬各一錢。牛膝神麴陳皮黃蘗各七分。甘草五味各八分。煎服三十餘貼。仍以龜

板參芪黃檗各二兩熟地萸肉枸杞杜仲歸芪牛膝各一兩丸服尋
愈

盧不遠治浦江張二如病脊脊痛難于起拜形偃俚楚甚盧診之謂曰此
房後風入髓中骨氣不精故屈伸不利用龜鹿四仙膠服三月以填骨髓
佐透冰丹二十粒以祛腎風遂全愈

祝如穹治一人患心重如千觔下墜背彎不能直每發時疼痛難忍眼
直出舌俱咬啐無藥可療祝曰此必打銅錫生理終日用力傷於飢餓
以慾事或因偷情為人所驚精不得洩用槌則彎背驚則心血走不
腎氣逆以氣裹血滲留胞絡遂成茲證究之果打銅匠也乃以麻苴
各一錢茯神香附歸尾赤芍各八分甘草四分兩劑發汗而心輕
大黃三錢赤芍枳實黃檗黃芩各一錢兩劑便通而背直
黃丸一料而用力生理如常時矣

震按汪案養陰益氣盧案補精搜風祝案汗下以通經溫納固腎俱

真實學問。非膚淺伎倆。尚有未備者。背屬太陽。若暴痛。則審其脉浮緊。為傷寒。脉沉緩。為寒溼。麻黃湯。羌活勝溼湯。可酌用也。脊係督脉。若久痛。則審其熱。而痛為陰虛。冷而痛為陽虛。麋茸六味。鹿茸八味。可分用也。若肩背痛。則兼肺經。腰背痛。則兼腎經。又當各求其因而治之。更有胸與背互換作痛。項與背牽連作痛。背痛徹心。心痛徹背。散在諸書。均宜博覽。附許叔微家一婦人。夢二蒼頭。一在前。一在後。手中持一物。前者云。到也。未後者云。到也。擊一下。爆然有聲。遂覺背心一點痛。不可忍。昏悶移時。叔微所合神精丹。有此證。即取三粒。令餌之。過數刻。痛止神醒。其方出千金中。殆晉景公。夢二豎之比也。震按本事方云。今欲再合神精丹一料。惜曾青磁石難得真者。夫宋時已難得。則近日更難得。所以此方無人道及。

脇痛

張戴人治一人病危篤。自述曰。我別無病。三年前隆暑時。出村野。有以煮

酒饋予者。冷飲數升。便覺左脇下悶。漸作痛。結硬如石。至今不散。鍼灸摩藥。殊無寸效。張診之。兩手俱沉實而有力。先以獨聖散吐之一涌。二三升。氣味如酒。其痛即止。後服和脾安胃之劑而愈。

震按脇下結硬如石的係積塊。若宗養正積自除之說。而用參朮。何異助紂為虐。幸遇戴人以涌法起其沉疴。亦賴脉之沉實有力耳。因知善於切脉。則如禮樂與干戈。俱能戡亂致治也。

虞天民治一人。年四十餘。因騎馬跌撲。次年左脇脹痛。醫與小柴胡湯。加青皮龍膽草等藥。不效。診其脉。左手寸尺皆弦數。而瀉關脉。孔而急數。右三部惟數。而虛。虞曰。明是死血證。用抵當丸一劑。下黑血二升許。後以四物湯加減調理而安。

震按橘泉翁治一老八十餘。左脇大痛。腫起如覆盃。手不可近。謂有瘀血在脾中。而立齋治。一人右脇脹痛。喜用手按。謂是肝木剋脾土。而脾土不能生肺金。若內有瘀血。雖單衣亦不敢着。肉此可以樹辨證之洪。

範矣。又李士材治李明奇，素雄壯，忽左脇痛，手不可近，用左金丸瀉肝湯。至月餘，痛處漸大，右脇亦痛，不能行動，神氣如癡惚，若有所失，面色黃，兩關脈促，謂其畜血已深，非快劑不下。用桃仁承氣湯一服，不動，再加乾漆生大黃五錢，下血塊十餘枚，遂痛止，神清，惟見困倦。先與獨參湯，再用八珍湯調理，三月而康。此與橘泉之用承氣加歸芍柴胡黃藥黃連者，微有不同，但連藥苦寒，何以瘀血亦下也。

薛立齋治一婦人，飲食後因怒患瘧，嘔吐，用藿香正氣散二劑而愈。後復怒吐痰甚多，狂言熱熾，胸脇脹痛，手按少止，脈洪大，無倫按之微細，此屬肝脾二經血虛，以加味道遙散加熟地、川芎二劑，脈證頓退，再用十全大補而安。此證若用疎通之劑，是犯虛虛之戒矣。

震按薛翁自己之註釋及後金壇之垂戒，學者所當切記。

石山治一人，客維揚，病脇痛，醫以為虛，用人參羊肉補之，其痛愈甚。一醫投龍薈丸，痛減。汪診脈弦濡而弱，曰脾胃為痛，所傷尚未復，遂以橘皮枳

木丸加黃連當歸服之而安。越五年腹脇復痛。彼思頗類前病。欲服龍會丸未決。汪診之。脉皆濡弱而緩。曰前病屬實。今病屬虛。非前藥可治也。以人參為君。芍歸芍藥為臣。香附陳皮為佐。甘草山梔為使。煎服十餘貼。痛止食進。

震按此人之脉先後皆濡弱。惟弦與緩不同。而先用清後用補者。豈以弦為肝火。緩屬脾虛耶。然弦而濡弱亦宜補不宜清矣。觀立齋治馬庠生之母。左胛連脇作痛。其脉右關弦長。按之軟弱。左關弦洪。按之滯。薛曰鬱怒傷肝脾。六君加芍歸而愈。則弦脉又不得盡責之肝火也。王金壇曰雲中秦文山掌教平湖。每患脇痛。遇勞忍餓則發。以書介家兄來求方。予以參朮朮地黃芍歸萸肉棗仁牛膝木瓜石斛苡仁柏子仁桃仁之屬。令常服之。後來謝云。自服藥後積久之疾。一朝而愈。不復發矣。聞魏崑溟吏部亦以勞餓得脇痛。無大病也。而醫者投以枳殼青皮破氣之藥。痛愈甚。不數日而殞。予故著之以為世戒。

一人六月途行受熱過勞性又躁暴忽左脇痛皮膚上一片紅如碗大發水泡瘡三五點脉七至而弦夜重於晝醫作肝經鬱火治之以黃連青皮香附川芎柴胡之類進一服其夜痛極且增熱次早視之皮膚上紅大如盤水泡瘡又加至三十餘粒醫教以水調白礬末敷仍於前藥加青黛龍膽草進之夜痛益甚脇中如鈎摘之狀次早視之紅及半身矣水泡又增至百數乃求王古澤為訂一方以大瓜萸一枚重一二兩者連皮搗爛加粉草二錢紅花五分進藥少頃即得睡比覺已不痛矣蓋痛勢已急而時醫執尋常瀉肝正治之劑又多苦寒愈添其燥故病轉增劇水泡瘡發於外者肝鬱既久不得發越乃侮所不勝故皮腠為之潰也瓜萸味甘寒經云泄其肝者緩其中且其為物甚柔潤於鬱不逆甘緩潤下又如油之洗物未嘗不潔此其所以奏效之捷也歟

震按金壇之妙解從儒理中流露出來俗人初見此方毫不解其何意也但此方適合此證耳後之學者勿遽執為錦囊秘策

孫東宿治李悅齋夫人胸脇大腹作痛。謔語如狂。寅卯辰三時少輕。午後及夜痛劇。咬人。晝夜不睡。飲食不進者。十八日。究其故。原有痰火與頭疼牙疼之疾。又因經行三日後。頭疼發寒熱。醫以瘧治。因大惡熱。三四人交扇之。而兩手浸冷水中。口噙水而不嚥。鼻有微衄。又常自悲自哭。目以多哭而腫。小水直下不固。喉梗梗吞藥不下。脉則左弦數。右關洪滑。孫曰。此熱入血室證也。誤服剛燥之劑。而動痰火。以致標本交作。諸人猶謂熱入血室。惟夜間譏語如見鬼。何至胸脇疼劇。咬人耶。孫曰。仲景云。經水適來。適止得疾。皆作熱入血室治。痛極咬人者。乃胃虛蟲行求食而不得。故喉中梗梗然也。即以小柴胡加桃仁丹皮而譏語減。次日以安回湯與服。而震按痛極咬人。合以喉中梗梗。認為蛔飢求食。亦屬偶然應驗。若欲據以辨證。恐不足憑。

膝痛

徐可豫治吳興沈中剛內子。膝腫痛。右先劇。以熱熨則攻左。熨左攻右。俱

發則雷鳴上胸已而背悉若受萬筮者獨元首弗及發則面黛色脉因跳
昏作旦輟日疋弱甚醫望色輒卻謂勿救徐視脉竟曰是濕淫所中繼復
驚傷膽疾雖劇可治即令以帛纏胸少間探咽喉間湧青白涎沫幾斗許
涌定徐曰今茲疾發至腹則弗上面弗青矣至昏膝痛仍加慰鳴果弗
及胸止三鼓已定皆如徐言越三昏不復作遂痊

震按溼則生痰驚則痰阻古有驚痰沃膽之說所以面青也痰隨氣動
所以升降作痛也一吐而愈是得戴人心法者

鶴膝風

州守張天澤左膝腫痛胸膈痞滿飲食少思時作嘔頭眩痰壅日晡殊倦
用葱熨法及六君加炮薑諸證頓退飲食稍進用補中益氣加蔓荊子頭
目清爽肢體康健間與大防風湯十餘劑補中益氣三十餘劑而消

一婦人發熱口乾月經不調半載後肢體倦怠二膝腫痛作足三陰血虛
火燥治之用六味地黃丸兩月餘形體漸健飲食漸進膝腫漸消半載而

症

震按此是立齋醫案。雖僅二條。而治法大備。蓋鶴膝風乃足三陰經虧損。寒溼乘虛而入。故所用四方是要藥。若欲作膿或潰後。又宜十全大補湯。若兼頭暈吐痰。小便頻數。須佐以八味丸。皆要法也。惟初起時。以葱熨或雷火針。使其內消為妙。又預防法。用艾絨縫入護膝。將大紅絹作裏面。着肉縛之。晝夜不脫。可免此病。

腳氣

東垣治一朝貴。年近四十。身體充肥。脚氣始發。頭面渾身支節微腫。皆赤色。足脛赤腫。痛不可忍。手近皮膚。其痛轉甚。起而復卧。卧而復起。日夕苦楚。春間李為治之。其人以北土高寒。故多飲酒。積久傷脾。不能運化。飲食下流之所致。投以當歸拈痛湯。一兩二錢。其痛減半。再服。腫悉除。只有右手指末微赤腫。以三稜針刺指爪甲端。多出黑血。赤腫全去。數日後。因食溼麩。肢體覺痛。再以枳實五分。大黃酒煨三錢。當歸一錢。羌活一錢五分。名

曰枳實大黃湯。利兩行而痛止。夫腳氣水溼之為也。麩滋其溼。血壅而不
行。故肢節煩痛。經云風能勝溼。羌活辛溫透關節去溼。故以為主。血留而
不行。則痛。當歸之辛溫散壅止痛。枳實之苦寒治痞消食。故以為臣。大黃
苦寒以導麩之溼熱。併治諸老血留結。取其峻快。故以為使也。

張戴人治毘陵馬姓。患腎臟風。忽一足發腫如瓠。自腰以下鉅細通為一
律。痛不可忍。欲轉側。兩人扶之。方可動。或欲以鉞刀決之。張曰。此腎臟風
攻注腳膝也。乃以甘遂一兩。木鱉子二箇。一雄一雌。為末。獮猪腰子二箇。
剖開。藥末一錢。糝勻。溼紙裹數重。慢火煨熟。五更初細嚼。米飲下。積水多。
則利多少。則利少也。宜軟飯。將息。若病患一脚。切看左右。如左腳用左邊
腰子。右腳用右邊腰子。藥末只一錢。辰已間下膿水。如水晶者數升。即時
痛止。再以赤烏散塗貼其膝。方愈。

項彥章治史僉憲。足病發則兩足如柱。漬黃水。踰月乃已。已輒發。六脉沉
緩。沉為裏。有溼。緩為厥。為風。此風溼毒。俗名溼腳氣是也。以神芩丸。舟車

神佑丸。大下濁水而愈。

震按此二條即北方治法也。

趙良仁云。予至吳中有徐孟達。患兩足痠重。不任行動。發則腫痛。一日於不發時診脉。三部皆大搏。手如葱管。無力。身半以上則肥盛。蓋其膏梁妾御。嗜欲無窮。精血不足。溼熱太盛。因用益精血於其下。清溼熱於其上。二方與之。或言脚氣無補法。故不肯服。三月後痛作。一醫用南方法治。不效。一醫用北法瀉之。即死於溺器上。吁。業岐黃者。虛實之辨。蓋可以忽乎哉。丹溪治一婦。足腫。用生地黃。藥蒼朮。南星。紅花。牛膝。龍膽。草。川芎。治之而愈。

立齋治一婦人。脚患筋攣骨痛。諸藥不應。脉緊。用大防風湯。二劑頓退。又二劑而安。

江應宿曰。予友人余近峯賈秣陵。年五十餘。患腳痛。卧不能起。年餘。脛與腿肉俱消。邑醫徐古塘。昔患痺疾。治愈。求其成方。初用當歸拈痛湯。二服。

效次用十全大補湯。加枸杞子。防己。牛膝。萆薢。朝用六味地黃丸。加虎脛骨。牛膝。川萆薢。鹿角膠。服三年。雙鑠如初。徐云久久服之。自獲大益。幸勿責效於旦夕。信然。

震按脚氣之病。近來罕見。或有足脛赤腫痛不可忍者。即俗所謂流火也。或有手足互換而痛。肢節微腫。或熱或赤色者。即書所謂行痺也。治法不外去溼清熱涼血。亦有用木附桂枝者。要在辨其虛實及溼熱寒溼之分耳。戴人項公之治法。殊可不必。若東垣案全似周痺治法。拈痛湯。分消其溼熱也。枳實大黃湯。驅逐其溼熱也。若朱案亦痺證治法。薛案江案用補。稍覺不同。外有柳柳州所纂乾腳氣。左脇有塊大如石。痞絕且死。以杉木節橋葉檳榔童便煎利之而愈。蔡元長忽如有蟲自足心行至腰間。即暈絕。灸風市穴而愈。及楊梅仁治童貫。搥田螺傳兩股治。董守約。今僅存其說。未有合其證而可以試用者。故不詳錄。

孫東宿曰。一貧士兩足不痠不痛。每行動絕不聽其所用。或扭於左而又

墜於右或扭於右而又墜於左之左而行不能一步正走此亦目之希覿書所未載予臆度之由筋軟不能束骨所致故行動則偏斜扭墜也夫筋者肝之所主肝屬木木縱不收宜益金以制之用人參黃芪白芍以補肺金以仁虎骨龜板杜仲以壯筋骨加鐵華粉以專制肝木煉蜜丸早晚服之竟愈。

震按此非腳氣而附於此者從其類以便覽也

附張李明曰一士人得腳弱病百藥不效予令其用杉木為桶濯足又令排樟腦於兩股間以腳棚繫定月餘而安健如初

江篁南治一少年夏月因以冷水浸兩足跟又坐溼地患足跟腫痛不能移步致臥數月乃教以乾土坵一塊挖一凹如足跟大炭火燒紅去火用醋一碗沃之任其溼乾即以足跟臨土坵初略懸高熏之漸漸近之其下體骨節皆痠快不可言且有微汗連換土磚熏三四日而愈

子西席鍾滄柱先生少年得腳弱病痠楚無力兼小便艱難欲便必久

立始通服大補肝腎藥不應乃求治於何嗣宗先生用六味地黃丸加黃牛腿骨髓一具而愈因悟前之治病者道在邇而求諸遠也何係江南大名家當時佳案必多惜余生也晚不獲親炙其風儻無從抄錄

脚上諸證

薛立齋治閣老靳介菴脚指縫作痒出水腫焮脚面敷止痒之藥不應服除溼之藥益甚薛診之曰陰虛溼熱下注也用六味地黃補中益氣而愈

一儒者脚心發熱作痒搔搗滾水浸潰而出水肌體骨立作喝吐痰用益氣湯六味丸年餘元氣復而諸證愈

一儒者脚踝腫硬色白兩月餘矣用大防風湯及十全大補兼服而消後場屋不利飲食勞倦證復作盜汗內熱飲食不化便滑肌瘦復加頭暈或頭痛痰湧此腎不納氣用八味丸益氣湯百餘劑而安

孫東宿曰一人生楊梅瘡後偶遭一跌環跳脫出不能復入窠白疼痛殊

甚兩足因長短不齊。予思不能復入窠臼者。以瘀血流。入窠臼。占滿故窠。致骨不得復入也。今但消去瘀血。必以行氣活血之劑為主。以下行嚮導之劑佐之。庶可復原。用陳年窖中磚瓦洗淨煨過四兩。生地杜牛膝骨碎補丹參赤芍各一兩五錢。自然銅三兩。蒲黃車前子蘇木各一兩。鹿角二兩。元明粉五錢。各為末。以茅草根一觔。紅花四兩煎膏。拌晒前藥。再以蜜丸服之。得效。

震按薛氏立方平正。孫公用藥靈巧。均堪師法。但磚瓦宜用尿坑中者。不宜糞窖中者。

施笠澤治少司成張侗初。患足脛痛三年矣。診之脉沉細而澁。曰。此下焦元氣不足。不能榮養筋骨。當用滋補舒筋之劑。服後微效。因勞旋作。再診之脉兼浮數。元氣愈耗矣。為製人參膏。及河車天乙丸間服。元氣漸壯。獨兩脛作楚。不能忍。因製萬靈膏。去樟腦。加韶粉蘇合麝香。以軟帛緊繫兩脛。仍令飲甘草湯。不頃刻而痛若失。此膏良驗。方載本草綱目。後用黃耆

建中湯加參歸調理全安。

震按此條與前案俱以方之不同而違之。

面病

羅謙甫治楊郎中之內年五十餘體肥盛春患頭目昏悶面赤熱多服清上藥不效羅診其脉洪大而有內經云面熱者足陽明病脉經云陽明經氣盛有餘則身以前皆熱況其人素膏粱積熱于胃陽明多血多氣本實則風熱上行諸陽皆會于頭故面熱之病生矣先以調胃承氣湯七錢黃連二錢犀角一錢疎利兩三行撤其本熱次以升麻加黃連湯去經絡中風熱上行則標本之病俱退矣方以升麻葛根各一錢白芷七分甘草炙白芍各五分連芩酒製各四分川芎生犀末各三分荆芥穗薄荷葉各二分水半盞先浸川芎荆芥穗薄荷另以水二盞半煎至一盞半入先浸三味同煎至一盞食後溫服日三服忌溼麪五辛之物。

真定府維摩院僧年六十餘體瘠弱初冬頭面不耐寒氣弱不敢當風行

諸法不效。羅診其脉弦細而微。且年高常食素茶果。此陽明之經本虛。脉經云。氣不足則身已前皆寒慄。又加誦經文損氣。由此胃氣虛。經絡之氣亦虛。不能上達頭面。故大惡風寒。先以附子理中丸數服。溫其中。氣次以升麻湯加附子。行其經絡。方以升麻葛根各一錢。白芷黃芪各七分。炙甘草草豆寇仁人參各五分。黑附炮七分。益智三分。連鬚葱白同煎。數服良愈。或曰。升麻湯加黃連治面熱。加附子治面寒。有何依據。答曰。出自仲景。蓋診楊氏脉。陽明標本俱實。宜先攻其裏。後瀉經絡。中風熱。故升麻湯加黃連。以寒治熱也。尼僧陽明標本俱虛。寒宜先實其裏。次行經絡。故升麻湯加附子。以熱治寒也。仲景羣方之祖。信哉。

震按此二條。羅公自註甚明。由其熟讀內經。故能切實發揮。下二條講面黑之理。亦極有精義。

又治一婦三十餘歲。憂思不已。飲食失節。脾胃有傷。面色黧黑不澤。環唇尤甚。心懸如飢。飢不欲食。氣短而促。羅曰。人身心肺在上。行營衛而光澤。

於外色宜顯而不藏。腎肝在下。養筋骨而強壯。於內色當隱而不見。又必賴脾胃在中。傳化精微。以灌四傍。沖和而不愈。若其氣一傷。則四臟失所。今憂思不已。脾胃氣結。而不行。飲食失節。脾胃氣耗。而不足。故使陰氣上溢於陽中。而黑色見于面。又經云。脾氣通於口。其華在唇。今水反侮土。故黑色見于唇。此陰陽相反病之逆也。上古天真論云。陽明脉衰於上。面始焦。可知陽明之氣不足。乃用沖和順氣湯。以葛根一錢。五分。升麻。防風。各一錢。白芷。黃芪。各八分。人參。七分。甘草。四分。白芍。蒼朮。各三分。以薑棗煎。巳午前服。取天氣上升之時。使人之陰氣易達也。數服而愈。此陰出乘陽治法也。

有人因灸三里而滿面黑氣。醫皆以為腎氣浮面危候也。有人云。腎經有溼氣上蒸于心心火得溼成烟氣形于面而屬心。心腎之氣常相通。如坎之外體即離離之外體即坎。心腎未嘗相離也。耳屬水。其中虛則有離之象。目屬火。其中滿則有坎之象。抑可見矣。以去溼藥治之。如五苓散黃芪防己之類皆可用。

附興國初有任氏色甚美聘進士王公甫謂甫不遂寸祿愁鬱不樂面色漸黑自慚而歸母家求治一道人曰是可療也以女真散酒下二錢日兩服數日間面變微白一月如舊賂得其方乃黃丹紫苑等分為末耳震按此因愁鬱而致面黑此方恐未必效又有觸受穢臭面色忽黑者宜焚沉檀卻能著效

餘杭人和倅將赴官因蒸降真木犀香自開甑而仆甑面上為熱氣所熏面即浮腫口眼皆為之閉更數醫不能治一醫云古無此證以意療之乃取僧寺久用炊布燒灰存性隨傳而消未半月餘蓋以炊布受湯上氣多反用以出湯毒猶以鹽水取鹽味耳此心法之巧也

震按釜蓋氣水以治燒酒毒即同此義

耳

張友夔壯歲常苦兩耳痒日一作遇其甚時殆不可耐挑剔無所不至而所患自若也常以堅竹三寸許截之折為五六片細刮如洗帚狀極力撞

入耳中皮破血出或多至一蠅殼而後止明日復然失血既多為之困悴適有河北醫士周敏道至詢之曰此腎藏風虛致浮毒上攻未易以常法治也宜買透冰丹服之勿飲酒啖溼麵蔬菜雜豬之屬能盡一月為佳爰用其戒數日痒止而食忌不能久既而復作乃著意痛斷累旬耳不復痒震按此種奇痒斷非尋常之藥所能治若尋常耳痒或風或火亦易治也

立齋治一人年二十耳內出水作痛年餘矣脉洪數尺脉為甚屬肝腎二經虛熱用加減地黄丸料一劑而愈

又一男子每交接耳中作痛或作痒或出水以銀簪挖入甚喜陰涼此腎經虛火用加減八味丸而愈

又一婦人因怒發熱每經行兩耳出膿兩太陽作痛以手按之痛稍止怒則胸脇乳房脹痛或寒熱往來小溲頻數或小腹脹悶皆屬肝火血虛用加味道遙散諸證悉退以補中益氣加五味而痊

震按以上三案或憑脉或憑證亦皆易辨惟用加減八味丸者諒其尺脉必微弱或虛大故加溫藥以導納之若尺脉洪數似宜用知樂地黃丸

附一婦人於壁上取雞翎捲耳通蜈蚣生子在翎上帶入耳中生小蜈蚣穿腦內且痛且痒百藥莫效一醫令燒雞肉熱置一器內留一小孔蓋上令病者以耳受之雞香薰入蜈蚣悉攢雞肉上其病立愈

石山治一人年近六十面色蒼白病左耳聾三十年矣近年來或頭左邊及耳皆腫潰膿膿從耳出甚多時或又腫復膿今則右耳亦聾屢服祛風去熱逐痰之藥不效汪診左手心脉浮小而駛肝腎沉小而駛右脉皆虛散而數此恐乘輿遠來脉未定耳來早脉皆稍斂不及五至非比日前之甚數也夫頭之左邊及耳前後皆屬於少陽也經曰少陽多氣少血今用風藥痰藥類皆燥劑少血之經又以燥劑燥之則血愈虛少矣血少則溢滯溢滯則壅腫且血逢冷則凝今復以寒劑凝之愈助其壅腫久則鬱而

為熱腐肉成膿。從耳中出矣。漸至右耳亦聾者。脈絡相貫。血氣相依。未有血病而氣不病也。故始則左病而終至於右亦病矣。是為病久。氣血兩虛。且年六十。氣血日涸。而又出外勞傷氣血。又多服燥劑。以損其氣血。膿又大泄。以竭其氣血。則虛而又虛。可知矣。以理論之。當滋養氣血。氣血健旺。則運行有常。而病自去矣。否則不惟病不除。而腦癭耳疽。抑亦不免矣。人參二錢。黃芪三錢。歸身白朮生薑各一錢。鼠粘子連翹柴胡陳皮各六分。川芎片苓白芍各七分。甘草五分。煎服十數貼而愈。

震按汪公之議論精微而又顯暢。用藥亦標本兼賅。真有掉臂遊行之樂。即初診時乘輿遠來。脈未定而不足憑之說。更可為鹵莽者鑒戒。江應宿治上舍孫順吾患耳鳴重聽。人事煩冗。雜治半年不愈。江視之脈數滑。以二陳加瞿麥扁蓄木通黃蘗。一服知。二服已。

震按耳鳴同而此案與下案法各不同。若易而用之。彼此無效。故知治病之難。難於識病也。

喻嘉言治大司馬王岵翁耳鳴論曰腎之竅開於耳耳之聰司于腎腎主閉藏因肝木為子能疏泄母氣而散於外故凡謀慮鬱怒之火一動耳竅不清聽遠稍礙較之聾病尚屬天淵聾病者竅中另有一膜遮蔽外氣不得入故以開竅為主而方書所用菖蒲麝香等藥及外填內攻等法皆為此而設至於高年之人腎氣既衰陰氣不自收攝越出上竅耳中如蛙鼓蚊鐸鼓吹不已外入之聲為其內聲所混聽之不清若得氣不逆上聽必自清當用磁石為主以其重能達下性主下吸又能制肝木之上吸再以地黃龜膠等羣陰之藥輔之更用五味子山茱萸之酸以收之令陰氣自守於本宮不上觸於陽竅則空曠無礙猶之收視而視愈明返聽而聽愈聰之理也方書治少壯人痰火鳴聾用滾痰丸多效者以黃芩大黃沉香之苦最能下氣而礞石之重墜大約與磁石之用相倣也

震按丹鉛續錄載王萬里患耳痛魏文靖公謂易之坎為耳痛恐則傷腎所致其論與此頗同而用青鹽鹿茸雄附為劑則藥之陰陽各別要

當以脉辨之。

鼻

江篁南治一壯年患鼻齕胸膈不利醫用苦寒驅風敗血之劑服之年餘其人倦怠甚目不欲開江診視右寸脉浮洪帶結餘部皆沉細而軟曰鼻齕雖是多酒所傷然苦寒驅風敗血之藥豈宜常服經曰苦傷氣又曰苦傷血。況風藥多燥燥勝血服之積久安得不倦怠耶且目得血而能視目不欲開者血傷倦怠者氣傷也。所謂虛其虛誤矣。治宜化滯血生新血四物加炒片苓紅茯苓陳皮甘草黃芪煎服兼服固本丸日就強健鼻齕亦愈。

震按前醫未必無功但苦於只守一法而不知變通耳江公方亦平淡即能強健且鼻齕皆愈者以前藥原對病服之太久致傷氣血卻祇是倦怠目不欲開無太虛證故畧與更張稍兼補養便可霍然至其化滯血生新血四物加片苓紅花實齕鼻良法。

古今醫案按

卷七

三十一

江應宿治王曉鼻塞氣不通利濁涕稠黏屢藥不效已經三年宿診視兩寸浮數曰鬱火病也患者曰昔醫皆作腦寒主治子何懸絕若是耶經曰諸氣臍鬱皆屬于肺河間云肺熱甚則出涕故熱結鬱滯壅塞而氣不通也投以升陽散火湯十數劑病如失。

震按韓懋治鼻瘖臭而痛以白礬末加硃少許吹之化水而消其藥太峻又謂此厚味壅溼熱蒸於肺門如雨霽之地突生芝菌乃用勝溼湯加瀉白散二劑而愈其說甚是至於類案所載鼻中毛出長一二尺漸粗如繩又鼻流腥臭水碗盛之有鐵色蝦魚走躍此則莫須有矣。

祝如穹治游成字患一證遍身畏寒夏月亦須綿襖夜即烘火鼻中全然不聞香臭鼻孔有一物如豆大痒極若以手爪入則又痛極惟以黃泥入鼻知為土氣常半月不開口無醫能治祝曰證有奇證醫有奇方令覓一間極小房四面砌磚不許漏風而四面俱錐一孔地下掘一小坑僅盤大可容人面然後鎖閉病人于房內用艾百朶漸從四面孔內燒入自晨至

午燒至三四十觔。烟塞滿房。不能容鼻。遂伏地而尋空隙。得盤大之小坑。以鼻抵之。須臾覺鼻息通暢。自午至子。偏身熱極。將綿襖俱脫。天明開門看時。其鼻中蒼疣已落。不畏風寒。服補中益氣湯十劑全愈。究此病所以因居樓上。木氣大甚。冬月用火太多。無縫可洩。木又生火。積久成癩。熱在臟腑。寒在皮膚。用艾以灸皮膚之寒。而通臟腑之竅。木入土而朽。火入土而燼。觀其病時。惟聞有土氣。固已得治法矣。

震按此法甚奇。然亦甚險。不可學也。夫人生於氣。如魚生於水。若以十笏小房。閉人於內。四面糊之。不通一竅。半日而人死矣。以其與天地之氣隔絕也。今雖四面有孔。孔既極小。又以艾烟薰入。掘地之坑。僅容人面。恐呼吸皆烟。悶極無逃。豈不危殆。

髮脫眉落

丹溪治一女子。十七八歲。髮盡脫。飲食起居如常。脉微弦而滑。輕重皆同。此厚味成熱。溼痰在膈。間復因多食酸梅。以致溼熱之痰。隨上升之氣至。

於頭薰蒸髮根之血漸成枯槁遂一時脫落治須補血升散乃用防風通聖散去硝惟大黃酒炒三次兼以四物合作小劑與之月餘診其脉知溼熱漸解乃停藥淡味二年髮長如初

立齋治一儒者因飲食勞役及惱怒髮脫落薛以為勞傷精血陰火上炎所致用補中益氣加麥冬五味及六味地黃丸加五味眉髮頓生如故

震按髮乃血之餘枯焦者血不足也若忽然脫落或頭皮痒鬚眉亦落乃血熱生風風搖木落之象酒客膏粱多此脉數者用通聖散宣洩風熱次用六味地黃丸如下條治法又有勞傷精血及惱怒陰火上炎而致者宜用此條治法

又治一男子年二十巔毛脫盡亦先以通聖散宣其風熱次用六味地黃丸不數日髮生寸許兩月復舊

江應宿見一男子眉毛脫落遇方士教服鹿角膠每日侵晨酒化一二錢半年眉髮長年餘復舊

震按髮落補腎宜兼補心。若眉落宜兼補肝。以眉稟木氣而側生也。但肝為風臟。眉落多是患風之徵。防成癘風。至於鬚落必係腎虛。以鬚稟水氣而下生也。魏書李元護為齊州刺史。姬妾十餘。聲色自縱。情慾既甚。肢骨消削。鬚長二尺。一時落盡。又北史載王頌痛父僧辨為陳武帝所殺。至隨滅陳後。召父時壯士。潛發其陵。剖棺見陳武帝鬚皆不落。其本皆出自骨中。此雖賦形不同。亦可見腎氣之獨厚。故勇畧殊常也。

目

東垣治一人因多食豬肉煎餅。同蒜醋食之。後復飲酒大醉。卧于煖炕。翌日。二瞳子散。大于黃睛。視物無的。實以小為大。以短為長。卒然見非常之處。行路踏空。百治不效。曰。經云。五臟六腑之精氣。皆上注于目。而為之精。精之窠為眼骨之精。為瞳子。又云。筋骨氣血之精。為脉。并為系。上屬于腦。又云。瞳子黑眼法于陰。今瞳子散大者。由食辛熱物太甚故也。辛主散。熱則助火。上乘于腦。中其精。故散精散。則視物亦散大也。夫精明者。所以視萬

物者也。今視物不真，精且衰矣。蓋火之與氣，勢不兩立。經曰：壯火食氣，壯火散氣，手少陰足厥陰所主。上連目系，邪之中人，各從其類。風與熱，循此道而來攻，故頭目腫悶，而瞳子散大，皆由血虛陰弱所致也。當除風熱，涼血益血，以收耗散之氣，則病愈矣。用滋陰地黄丸。經云：熱淫所勝，平以鹹寒，佐以苦甘，以酸收之。以黃芩、黃連、大苦寒，除熱邪之盛，為君。當歸、身、辛、溫、生熟地、黃、苦、甘、寒，養血涼血，為臣。五味、酸、寒，體輕浮，上收瞳子之散大。人參、甘草、地骨皮、天門冬、枳殼、苦、甘、寒，瀉熱補氣，為佐。柴胡引用，為使。忌食辛辣物，助火邪。及食寒冷物，損胃氣，藥不能上行也。

震按此案講致病之源流，論用藥之道理，最精最當。孟子所謂規矩方圓之至也。

魏夫人目翳暴生，從下而起，其色綠，腫痛不可忍。東垣曰：翳從下而上，病從陽明來也。綠非五色之正，此腎肺合而為病，乃以墨調膩粉合之，卻與翳色相同。腎肺為病明矣。乃瀉腎肺之邪，入陽明之藥，為使，既效矣。他日

病復作者三其所從來之經與翳色各異因悟曰諸脉皆屬于目脉病則目從之此必經絡未調則目病未已也因視所不調者治之疾遂不作

震按此辨翳色甚巧後之復發者三翳色各異合以諸脉皆屬於目之經文自當恍然雖不載方藥而云視所不調者治之亦可以意會矣

省郎中張子敬年六十七病眼目昏暗唇微黑色皮膚不澤六脉弦細而無力一日出示治眼二方問可服否羅謙甫曰此藥皆以黃連大苦之藥為君諸風藥為使夫人年五十膽汁減而目始不明內經云土位之主其瀉以苦諸風藥亦皆瀉土年近七十脾胃虛而皮肉枯重瀉其土使脾胃之氣愈虛而不能營運榮衛之氣滋養元氣胃氣不能上行膈氣吐食諸病生焉此藥不可服祇宜慎言語節飲食懲忿窒慾此不治之治也張以為然明年春除關西路按察使三年致仕還精神清勝脉亦和平此不妄服寒藥之效也內經曰誅伐無過是謂大惑豈不信哉

震按專門眼科常用黃連觀羅公之論皆當警省至於不治之治四句

確為明目祕方。若不依此調理，而僅不服寒藥，亦屬無益。

丹溪治一老人，目忽盲，他無所苦。以大虛治之，急煎人參膏一觔，服二日，目稍有見。一醫與青礞石藥，朱曰：今夕死矣，果然。

震按此案，即內經所謂氣脫者，目不明也。後薛立齋一案，用六味地黃丸加麥冬五味，即難經所謂脫陰者，目盲也。下二條一係受溼，一係瘀血，亦皆用補藥為君。總由忽然而盲，不因赤昏腫痛所致。及翳障努肉所蔽，則因五藏之精華內竭，不復上聚於目，故非補不可也。

一壯年忽早起視物不見，就睡片時，畧見而不明，食減倦甚，脉緩大，四至之上重，則散而無力，意其受溼所致。詢之果卧溼地半月，遂以白朮為君，黃芪茯苓陳皮為臣，附子為使，十餘貼愈。

一人形實，好熱酒，忽目盲，脉濇，此熱酒傷胃氣，污濁血死其中而然也。以蘇木作湯調人參末，服二日，鼻及二掌皆紫黑，朱曰：滯血行矣。以四物加蘇木桃仁紅花陳皮煎調人參末，服數日而愈。

呂滄洲治一人病二目視物皆倒植屢治不效曰視一物為二視直為曲
古人嘗言之矣視物倒植誠所未喻也願聞其因彼曰某嘗大醉盡吐所
飲酒熟睡達曙遂病呂切其脉左關浮促餘部皆無恙即告之曰當傷酒
大吐時上焦反覆致倒其膽府故視物皆倒植此不內外因而致內傷者
也法當復吐以正其膽府遂授藜蘆瓜蒂為粗末水煎俾平旦頓服涌之
涌畢視物不倒植

淮安陳吉老儒醫也有富翁子忽病視正物皆以為斜凡几案書冊之類
排設整齊必更移令斜自以為正以至書寫尺牘皆然父母憂之醫者不
諳其疾或以吉老告遂携子求治既診脉後令其父先歸留其子設樂開
宴酬勸至醉乃罷扶病者坐轎中使人舁之高下其手常令傾倒展轉久
之方令登榻而卧達旦酒醒遣之歸家前日斜視之物皆理正之父母躍
然而喜往問治之方吉老云醉中嘗閃倒肝之一葉搭于肺上不能下
故視正物為邪今復飲之醉則肺脹展轉之間肝亦垂下矣藥安能治之

哉。富翁嘆服。

按肺居膈上。肝位膈下。如風馬牛不相及。猶知解訓學者類能言之。肝葉馬能上搭於肺。陳醫之治愈富翁子。實屬微幸。一郡試源附識。

震按呂陳二案。驟聞其說似無對證。及觀其法。著有成驗。真可謂隔垣之見矣。量古人決不造謊以欺天下後世也。鼻端生贅。腦後下針。世間原有此種仙術。第如余之庸闇。終在將信將疑之間耳。再考錢仲陽案。方巧而理顯。則平淡中之神奇矣。

錢仲陽治一乳婦。因悸而病。既愈。目張不得瞑。錢曰。煮郁李酒飲之。使醉即愈。所以然者。目系內連肝膽。恐則氣結。膽衡不下。郁李能去結。隨酒入膽。結去。膽下。目能瞑矣。飲之果驗。孫真人奉旨治衛才人眼疼。前衆醫不能療。或用寒藥。或用補藥。加之藏府不和。孫診之。肝脉弦滑。非壅熱也。乃年壯血盛。肝血併不通。遂問宮人。月經已三月不通矣。用通經藥。經行而愈。

震按肝脉弦滑。能不誤認為風痰病眼乎。因肝藏血。而知其血盛不通。誠切當矣。然猶問宮人。始得停經三月之信。並不先言據脉當停經也。真人尚如此。奈何諱疾者。每不言。以責其斷病耶。此正犯東坡所謂我

欲困醫而我病亦適為醫所困耳

石山治一婦年踰四十兩眼昏昧咳嗽頭痛似鳴而痛若過飢惡心醫以眼科治之病甚翁診脉皆細弱脾部尤近弦弱曰脾虛也東垣云五臟六腑皆稟受于脾上貫于目脾虛則五臟之精氣皆失所司不能歸明于目矣邪逢其身之虛隨眼系入于腦則腦鳴而頭痛心者君火也宜靜相火代行其令勞役運動則妄行侮其所勝故咳嗽也醫不理脾養血而以苦寒治眼是謂治標不治本乃用參芪各一錢五分麥冬貝母各一錢歸身八分陳皮川芎黃芩各七分甘草菊花各五分麥芽四分煎服二貼諸證悉除薛已治給事張禹功目赤不明服祛風散熱藥反畏明重聽脉大而虛此因勞心過度飲食失節以補中益氣加茯神棗仁山藥山茱萸五味頓愈又勞役復甚用十全大補兼以前藥漸愈却用補中益氣加前藥而痊東垣云諸經脉絡皆走于面而行空竅其清氣散于目而為精走于耳而為聽若心煩事冗飲食失節脾胃虧損心火太甚百脉沸騰邪害孔竅而失

明矣。况脾為諸陰之首。目為血脉之宗。脾虛則五藏之精氣皆失其所。若不理脾胃。不養氣血。乃治標而不治本也。

震按此二案。專治脾虛。並不治目。而目亦愈。蓋治脾虛。即所以治目。由於診脈得其要領也。惟同用參芪。汪案則佐以麥冬貝母川芎黃芩菊花。因有咳嗽頭痛尚帶一二分客邪耳。薛案則純補兼佐酸收。因曾服祛風散熱藥。反畏明重聽。迨補之得愈。而勞復甚。其虛為尤甚耳。一儒者日晡兩目緊澹。不能瞻視。此元氣下陷。用補中益氣倍加參芪數劑而愈。

震按婁全善云。陽虛則眼稜緊急。陰虛則瞳子散大。故目緊澹宜用參芪。東垣有說可考。但佐使之藥。宜辛味疎散。忌芍藥五味之類。酸收耳。一男子年二十。素嗜酒色。兩目赤痛。或作或止。兩尺洪大。按之微弱。薛謂少年得此。目當失明。翌早索途而行。不辨天日。衆皆驚異。與六味地黃丸加麥冬五味。一劑頓明。

一人患眼疾。每睡起則眼赤腫。良久卻愈。百治莫效。師曰：此血熱。非肝病也。卧則血歸于肝。熱血歸肝。故令眼赤腫也。良久却愈者。人卧起。血復散于四肢。故也。遂用生地黃汁。浸粳米半升。滲乾。曝令透骨乾。三浸。三乾。用磁瓶煎湯一升。令沸。下地黃米四五匙。煎成薄粥湯。放溫。食半飽。後飲一二盞。即睡。如此兩日。遂愈。生地黃汁涼血故也。

一婦病熱。目視壁上。皆是紅蓮花。滿壁。醫用滾痰丸下之。愈。

一人眼前常見禽蟲飛走。捉之即無。乃肝膽經為疾。用酸棗仁。羌活。元明粉。青箱子。各一兩。為末。每水煎二錢。和渣服。日三服。

趙卿良醫也。有機警。一少年眼中常見一小鏡子。諸醫不效。趙診之。與少年期來。晨以魚鱸奉候。少年及期赴之。延于內。且令從容。俟客退。方接。俄而設桌。施一甌芥醋。更無他味。卿亦未出。迨日中久候不至。少年飢甚。且聞醋香。不免輕啜之。遂巡又啜之。覺胸中豁然。眼花不見。因竭甌啜之。趙卿方出。少年以啜醋慚謝。卿曰：郎君先因喫膾太多。芥醋不快。又有魚鱸。

在胸中。所以眼花。適來所備芥醋。只欲即君因飢以啜之。果愈此疾。烹鮮之會。乃權詐也。

震按以上四條。皆異疾奇方。可備參考。但眼科證候甚多。所選諸案。十不得一。須以治目各種書籍。廣搜遍閱。方有見解。而手法尤宜從師學習。切戒草率。

一婦人眼中忽有血如射而出。或緣鼻下。但血出多時。即經不行。乃陰虛相火之病。遂用歸尾生地黃酒芍加柴胡黃檗知母條芩側柏葉木通紅花桃仁水煎。食前服。數劑而愈。

震按眼衄多是腎陰虛。肝火旺。此卻是倒經。由於血出多。即經不行。可以問而知之也。

孫東宿治孫如亭令正。年過四十。眼偶赤腫。兩太陽疼痛。大便不行者三日。平時汎期。一月僅兩日。今行四日未止。眼科余雲谷醫治。踰候腫赤不消。而右眼內眥突生一白泡。垂與鼻齊。太二寸餘。余見而駭走。以為奇疾。

莫能措劑。又見其嘔吐眩暈，伏于枕上，畧不敢動。稍動則眩愈極，吐愈急。辭不治。孫診之，兩寸關脈俱滑，大有力。兩尺沉微。孫曰：此中焦有痰，肝膽有火，必為怒氣所觸而然。內經云：諸風掉眩，皆屬肝木。諸逆衝上，皆屬於火。蓋無痰不能運也，眼眇白泡，迺火性急速，怒氣加之，氣乘於絡上而不行，故直脹出眼外也。古壯士一怒而目眇裂，與白泡脹出眇外，理同。肝為血海，故血亦來不止。治當抑其肝木，清鎮痰火，則諸症自瘳。先用薑汁益元丸，壓其痰火，以止嘔吐，再以二陳湯加酒連酒、芩、天麻、滑石、吳茱萸、竹茹、枳實一貼，眩吐俱定，頭稍能動。改用二陳加芩連穀精草、夏枯草、香附、吳茱萸、苡仁，四劑目疾全愈，血海亦淨。

震按此案現證甚怪，治法甚穩。因知醫病祇要明理，毋庸立異也。

周慎齋治一人喪子，悲哀太過，兩目腫痛，用獨參湯而愈。蓋悲哀則傷肺，金虛則木寡，子畏肝火上逆，而目痛。人參補肺，肺王則木沉，火降也。

震按兩目腫痛，用獨參湯奇矣。及講明其理，始知是正，非奇。然亦須審

兼見之證與脉象若何。蓋木寡于畏。肝火上逆。目既腫痛。而或赤脉若弦大而且數。口渴內熱。投以此方。不虞其痛之喪明乎。

報國澄和尚患眼疾二年。服祛風清熱藥過多。致耳鳴嘈嘈不止。大便常苦燥結。近來左眼上微翳。見燈火則大如斗。視月光則小如螢。詢諸方家。俱莫能解。因以質之石頑。石頑曰。此水虧而陰火用事也。試以格物之理參之。如西洋玻璃眼鏡。以十二鏡編十二支為一套。無論老少。其間必有一者能察秋毫。則知人眼有十二種偏勝。故造眼鏡者亦以十二等鉛料配之。取鉛以助陰。精料以助陽。氣也。若鉛料之輕重與眼之偏勝不相當。則得之反加障礙矣。月乃至陰之精。真水內涵。不能泛濫其光。所以視之甚小。設加之以鉛重者。則視月必大矣。燈本燃膏之焰。專擾乎陰。不能勝其灼爍。所以見之甚大。設加之以料重者。燈火必愈大矣。合脉參證。知為平昔勞傷心脾。火土二藏過燥。并傷腎水。真陰也。遂疎天王補心丹與之。他如中翰徐燕及。見日光則昏迷如蒙。見燈火則精彩倍常。此平昔恒勞心。

腎上盛下虛所致。蓋上盛則五志聚于心包。暗侮其君。如權黨在位。蒙蔽九重。下虛則相火失職。不能司明察之令。得燈燭相助其力。是以精彩勝於常時。此與嬰兒胎寒。夜啼見火則止之義不殊。未識專事眼科者能悉此義否。

震按此論實有格物妙義。而於施治方法殊少發揮。後之閱者似難則倣。然余輯是書。祇從舊案。拔其精粹。非為對證檢方分門尋法者設也。理已講明。方可會悟。所謂中道而立能者從之。

咽喉

羅謙甫治征南元帥不隣吉。及年七旬。春間東征南。迴至楚邱。因過飲。腹痛腸鳴自利。日夜約五十餘行。咽喉疼痛。耳前後赤腫。舌本強。涎唾稠黏。欲吐不能出。以手曳之方出。言語艱難。反側悶亂。夜不能卧。羅診得脉浮數。按之沉細而弦。即謂中丞粘公曰。仲景云。下利清穀。身體疼痛。急當救裏。後清便自調。急當救表。救裏四逆湯。救表桂枝湯。總帥今胃氣不守。下利

清穀腹中疼痛。雖宜急治之。比之噎咽。猶可少緩。公曰。何謂也。答曰。內經云。瘡發于咽嗑。名曰猛疽。此病治遲則塞咽。咽塞則氣不通。氣不通則半日死。故宜急治。于是遂砭刺腫上。紫黑血出。頃時腫勢大消。遂用桔梗甘草連翹鼠粘子酒黃芩升麻防風等分。每服約五錢。水煎清。令熱漱之。冷吐出之。嚥下。恐傷脾胃。自利轉甚。再服涎清腫散。聲出後。以神應丸辛熱之劑。以散中寒。解化宿食。而燥脾溼。丸者。取其不即施行。則不犯其上焦。至其病所而後化。乃治。主以緩也。不數服。利止痛定。後胸中閉塞。作陣而痛。復思靈樞有云。上焦如霧。宣五穀味。薰膚充身。澤毛。若霧露之溉。是為氣也。今公年高氣弱。自利無度。致胃中生發之氣。不能滋養于心胃。故閉塞而痛。經云。上氣不足。推之揚之。脾不足者。以甘補之。用異攻散甘辛微溫之劑。溫養脾胃。加升麻人參上升。以順正氣。不數服而胸快利痛止。內經云。調氣之方。必別陰陽。內者內治。外者外治。微者調之。其次平之。勝者奪之。隨其條利。萬舉萬全。又曰。病食遠近。治有緩急。毋越其制度。又曰。急則治其

標。緩則治其本。此之謂也。

震按一人之病。而有寒熱兩岐者。當分緩急。後先施治。此案即是成例。斷勿學混沌湯。作一網兜之計也。但涼解藥。漱而弗嚥。恐亦無益。其涎清腫散者。想得力於砭刺耳。然今之喉證。用刀者。往往受害。此又氣運及風土。俱有不同所致。

附楊立之自廣府通判歸楚州。喉間生瘰。既腫潰而膿血流注。日夕不止。寢食俱廢。醫生束手。適楊吉老赴郡。二子邀之至。熟視良久。曰。不須看脉。已知之。然此疾甚異。須先啖生薑片一觔。乃可投藥。否則無法也。語畢即出。其子有難色。曰。喉中潰膿痛楚。豈能食生薑。立之曰。吉老醫術通神。其言不妄。試取一二片啣我。如不能進。屏去無害。遂食之。初時殊為甘香。稍復。加至半觔許。痛處已寬。滿一觔。始覺味辛辣。膿血頓盡。粥食入口。了無滯碍。明日招吉老謝而問之。曰。君官南方。多食鷓鴣。此禽好啖半夏。久而毒發。故以薑製之。今病源已清。無服他藥。

一人咽喉間生肉層層相疊漸漸腫起有竅出臭氣用臭橘葉煎服而愈。

一人但飲食若別有一咽喉斜過小膈下徑達左脇而作痞悶以手按之則漉漉有聲以控涎丹十粒服之少時痞處熱作一聲轉瀉下痰飲二升食正下而達胃矣。

江應宿治一人懸中下而赤皆以為熱遍施諒藥不效此中氣虛用補中益氣而愈。

馬銘鞠治倪仲昭患喉癰色中治喉者偏矣喉漸漸腐去飲食用粉麩之爛者必仰口而咽每咽泣數行下馬曰此非風火毒也若少年曾患徽瘡乎曰未也父母曾患徽瘡乎曰然愈三年而得我馬以為此必誤服昇藥之故凡患此瘡者中寒涼輕粉之毒毒發于身昇藥之毒毒發于愈後所生子女毒深者且延及於孫若甥倘不以治結毒之法治之必死以甘桔湯為君少入山豆根龍膽草射干每劑用土茯苓半觔濃煎送下牛黃二

分半月而痊。竟不用吹藥。後詢知伊父母果服昇藥愈。愈後曾口碎。故遺毒如此之烈也。

景岳治一來宅女人。年近三旬。患虛損。更兼喉癰疼痛。多醫罔效。張診其脈。則數而無力。察其證。則大便溏泄。問其治。則皆退熱清火之劑。然愈清火而喉愈痛。因知其本非實火。而且多用寒涼。以致肚腹不實。總亦格陽之類也。遂專用理陰煎。及大補元煎之類。出入間用。不半月而喉痛減。不半年而病全愈。

又治王蓬雀。年出三旬。患喉痺十餘日。頭面浮大。喉頸粗極。氣急聲啞。咽腫口瘡。痛楚之甚。一婢倚背坐而不卧者累日矣。及察其脈。則細數微弱之甚。問其言。則聲微似不能振者。詢其所服之藥。則無非芩連知槩之屬。此蓋以傷陰而起。而復為寒涼所逼。以致寒盛於下。而格陽於上。即水飲之類。俱已難入。而尤畏煩熱。張曰。危哉。再遲半日。必不救矣。遂與鎮陰煎。以冷水頓冷。徐徐使嚥之。用畢一煎。過宿而頭項腫痛盡消。如失。繼進五

福飲數劑而起。

震按古人喉證案無甚佳者。以上數條亦取其不同者而選之。王蓬雀案治法最佳。然此人能受溫補。故一劑即效。亦有投以溫補而不效者。即陽證陰脈之死候也。未可謂景岳之法概能活人。余鄉有戚許君。初起外感發熱。繼則左耳門生小癰。潰腐。認為聾耳。敷以藥。潰腐不退。通耳腫赤。延及頭面。皆腫赤。痛極。汗大出。身熱。反得涼。頗能進食。似覺稍安。越三日。忽又發熱。左耳前後連頭面。腫痛更甚。漸神昏譫語。蓋因連日出門登廁。復受風邪所致。內外科皆以脈小而數。按之無力。慮其虛陷。余友李昆陽兄至。曰是為耳遊風。非致命之瘡。重復冒風。故現險象。外敷以藥。內用大劑風藥散之。而腫痛與身熱俱退。惟神昏譫語不減。兩日後昏譫更甚。湯粥入口即吐。手足厥冷。呃逆不止。勢又危極。李以箸抉其口視之。則咽喉腐爛。懸雍亦紫腫大。如茄子下墜。脈仍細數。右手尤軟。乃曰連日不食。胃氣大虛。故嘔且呃。命以白米三升。大鍋煮。

粥取鍋面團結之粥油與食遂納而不吐。復用藥攪洗喉間之腐穢。隨以石膏四五兩。竹葉一大把。煎湯與漱。且服。服竟夜。神昏稍醒。呃止厥回。又進大劑。芩連白虎。梔翹等藥。數日得愈。此與景岳之案。冰炭相反。因思凡為醫者。讀古人書。斷不可執其一說。自以為是也。

唇

高果哉治魏子一。未發時常患唇乾燥。自服麥冬一兩。生地四錢。元參二錢。五味一錢。甘草六分。烏梅三個。雖有小效。而病根不去。果哉云。此證宜用神水。其法以鉛鎔化。散澆於地。成薄片。取起。剪作長條數塊。以一頭鑽眼。懸吊於鍋。鍋內置燒酒。燒酒之上。仰張一盆。與鉛片相近。鍋下燃火。使酒沸而氣上。冲於鉛片。鉛片上有水滴。下盆內。為之神水。取服之。以此水從下而上。能升腎中之水。救上之燥。乾也。

震按神水亦古方所載。而得高公之釋。其義始明。

口

程仁甫治一婦年近四十信來求藥云不時懸顴墮下勞苦即衄血或偏身作痛程雖未診視按經云喉舌之疾皆屬痰火推察其原又是陰血不足不能制上焦虛火而前證作矣必滋下焦陰血使水升火降病當不舉若峻用正治之藥上焦之火未去而中寒之疾復生前病何由得愈八物湯加桔梗陳皮貝母元參喉痛甚加荊芥薄荷丸用加減八味丸加黃蘗久服而安

一人口内生肉球有根線長五寸餘吐球出方可飲食以手輕按痛徹于心水調生麝香一錢頻服之三日根化而愈

舌

薛已治一婦人善怒舌本強手臂麻薛曰舌本屬土被木剋制故耳用六君加柴胡芍藥治之

一男子舌下牽強于大指次指不仁或大便秘結或皮膚赤暈薛曰大腸之脉散舌下此大腸血虛風熱當用逍遙散加槐角秦艽治之

一人舌腫脹舒出口外以草麻油蘸紙燃烟薰之而愈。

一人傷寒舌出寸餘連日不收用梅花片腦糝舌上應手而收重者用五錢方愈。

一婦人產子舌出不能收醫有周姓者令以硃砂末傅其舌仍令作產子狀以二女掖之乃於壁外潛累盆盎置危處墮地作聲聲聞而舌收矣。

江曰舌乃心之苗此必難產而驚心火不寧故舌因用力而出也今以硃砂鎮其心火又使倏聞異聲以恐下經曰恐則氣下故以恐勝之也。

本事方曰一婦人舌腫滿口不能出聲用蒲黃一味為末糝之一宿即愈良方曰一士人無故舌出血仍有小穴一醫云此名舌衄炒槐花為末糝之而愈。

牙齒

東垣治一婦人年三十齒痛甚口吸涼風則暫止閉口則復作乃溼熱也足陽明貫于上齒手陽明貫于下齒陽明多血聚加以膏粱之味助其溼。

熱故為此病。用黃連、梧桐淚、苦寒、薄荷、荊芥穗、辛涼治溼熱為主。升麻、苦辛引入陽明，為使牙者骨之餘。以羊脂、骨灰補之為佐。麝香少許入內，為引。作細末擦之，痛減半。又以調胃承氣去硝，加黃連以治其本。二、三行而止。其病良愈不復作。

一人因服補胃熱藥，致上下牙疼痛不可忍，牽引頭腦，滿面發熱，大痛。足陽明之別絡入腦，喜寒惡熱，乃是手陽明經中熱盛而作也。其齒喜冷惡熱，以清胃散治之而愈。

也。震按齒痛不屬陽明，即屬少陰。此二條與後易案乃兩大局正面文章也。

衛生十全方云：一人牙齒日長，漸漸脹開口，難為飲食，蓋髓溢所致。只服白朮愈。


魏云：可見腎虛者不宜服朮。

易思蘭治一人患齒病，每遇房勞或惱怒，齒即俱長，痛不可忍。熱湯涼水。

俱不得入發必三五日。苦狀難述。竟絕慾。服補陰丸。清胃。俱不效。易診其脈。上二部俱得本體。惟二尺洪數有力。愈按愈堅。乃曰。沉濡而滑者。腎脈。洪數有力者。心脈。今於腎部見心脈。是所不勝者。侮其所勝。乃妻入乘。夫腎中火邪盛矣。清胃飲。惟胃脈洪數者為宜。今胃脈平和清之。何益。腎主骨。齒乃骨餘。火盛而齒長。補之何益。况有乾薑。更非所宜。乃用黃檗三錢。以滋水泄火。青鹽一錢。為引。升麻一錢。升出腎中火邪。藥入口且漱。且燕服。後即覺丹田熱氣上升。自咽而出。再進二貼。病即全愈。

震按此案醫理講得最精。由於脈象診得的真。而更運以巧思。斯發無不中矣。清胃散之庸。誠不足責。即泛用滋陰藥。亦難應手。只此三味。銓解甚明。信乎缺一味不可。多一味不必也。余鄉有患齒痛數年。諸藥不效者。葉天士先生用山萸肉。北五味。女貞子。旱蓮草。各三錢。淮牛膝。青鹽。各一錢。而全愈。此取酸鹽下降。引腎經之火歸宿。腎經可與易公之方。並垂不朽。而其義各別。

古今醫案按卷第七終



K952

1909

v. 7